

FIQH IBADAH

DISUSUN OLEH:

Us. Azhar bin Awang

Ust. Nadia Zammil bin Md Nasir

**Us. Khairil Al-Hafiz bin Abdul Raman@Abdul
Rahman**

Taharah (Bersuci)

- Taarif Dari Segi Syarak
- Hikmah Bersuci
- Bahagian Air (4 jenis)
- Jenis-Jenis Bersuci
- Suci Daripada Najis
- Jenis najis dan Cara Menyucikan Najis tersebut
- Istinja'dan Adab-Adabnya
- Wudhuk
 - Taarif dan Dalil
 - Rukun Wudhuk
 - Sunat-Sunat Wudhuk
 - Perkara Makruh Wudhuk
 - Perkara Yang Membatalkan Wudhuk
- Mandi Hukum Dan Jenisnya
 - Taarif, Dalil Dan Hikmah
 - Mandi Yang Diwajibkan
- Tayamum
 - Taarif dan Dalil
 - Sebab yang mengharuskan tayammum
 - Syarat dan Rukun Tayammum
 - Perkara yang membatalkan tayammum

BERSUCI

Pengertian Bersuci

Bersuci menurut bahasa ialah bersih dan bebas daripada segala kekotoran sama ada di dalam bentuk nyata (حَسِّي), iaitu najis atau bentuk ma'nawi (مَعْنَوِي) iaitu perkara yang mengaibkan atau sifat-sifat terkeji.

Bersuci dengan air bermaksud membersihkan daripada kotor manakala bersuci daripada hadas bermaksud bebas daripada berhadas.

Bersuci pada syara' ialah perbuatan yang mengharuskan solat atau seumpamanya seperti berwudhu' bago orang yang belum berwudhu', mandi kepada seseorang yang diwajibkan mandi wajib dan menghilangkan najis daripada pakaian, badan dan tempat.

Keprihatinan Islam Terhadap Kebersihan dan Bersuci

Islam sangat prihatin tentang suci dan bersih sebagaimana keterangan berikut:

Pertama: Perintah dan suruhan berwudhu' untuk menunaikan solat setiap hari. Firman Allah SWT:

Maksudnya: Wahai orang-orang yang beriman, apabila kamu hendak mengerjakan sembahyang (padahal kamu berhadas kecil), maka (berwudhu'lah) iaitu basuhlah muka kamu, dan kedua belah tangan kamu meliputi siku, dan sapulah sebahagian dari kepala kamu, dan basuhlah kedua belah kaki kamu meliputi buku lali.

(Surah al-Maidah: 6)

Kedua: Gesaan supaya wajib mandi pada keadaan tertentu. Firman Allah SWT:

Maksudnya: Dan jika kamu junub (berhadas besar) maka bersucilah dengan mandi wajib.

(Surah al-Maidah: 6)

Ini jelas di dalam hadith, Rasulullah SAW bersabda:

Maksudnya: “Tanggungjawab setiap muslim kepada Allah ialah mandi sekurang-kurangnya sekali dalam seminggu dengan membasuh kepala dan badannya.”

Riwayat al-Bukhari dan Muslim

Ketiga: Perintah supaya memotong kuku, membersihkan gigi dan pakaian. Rasulullah SAW bersabda:

خَمْسٌ مِنَ الْفِطْرَةِ: الْحِثَانُ، وَالْإِسْتِحْدَادُ، وَنَتْفُ الْإِبْطِ، وَتَقْلِيمُ الْأَظْفَارِ، وَقَصُّ الشَّارِبِ

Maksudnya: “Lima perkara daripada fitrah ialah berkhitan, mencukur bulu ari-ari, mencabut bulu ketiak, memotong kuku dan menggunting misai.”

Riwayat al-Bukhari dan Muslim

Sabda Rasulullah SAW lagi:

لَوْلَا أَنِّي أَشَقُّ عَلَى أُمَّتِي لَأَمَرْتُهُمْ بِالسَّوَاكِ عِنْدَ كُلِّ صَلَاةٍ

Maksudnya: “Sekiranya tidak membebankan umatku, aku akan memerintahkan mereka supaya bersuci setiap kali bersolat.”

Riwayat al-Bukhari dan Muslim

Hikmah Pensyariatan Bersuci

Islam telah mensyariatkan supaya bersuci kerana ia mempunyai hikmah yang banyak. Sebahagian diantaranya:

Pertama: Bersuci adalah tuntutan fitrah manusia

Manusia secara tabi'inya cenderung kepada kebersihan dan tidak suka serta menjauhkan diri daripada kekotoran. Oleh sebab Islam adalah agama fitrah, maka secara *tabi'i* ia memerintahkan manusia supaya bersuci dan sentiasa menjaga kebersihan.

Kedua: Memelihara kemuliaan individu muslim

Manusia secara *tabi'i* cenderung kepada seseorang yang bersih dan suka duduk bersama-sama mereka. Oleh sebab itu, mereka berasa benci, memandang rendah, menjauhkan diri serta tidak mahu bersama-sama dengan individu yang pengotor. Oleh kerana Islam adalah agama yang sangat mengambil berat dalam menjaga kemuliaan individu yang beriman, maka Islam memerintahkan setiap mukmin itu menjaga kebersihan agar disegani di kalangan khalayak umum.

Ketiga: Memelihara kesihatan tubuh badan

Kebersihan amat penting untuk menjauhkan manusia daripada segala penyakit. Ini kerana kebanyakan penyakit yang menular di kalangan manusia adalah disebabkan kotoran. Apabila seseorang membersihkan badan, membasuh muka, dua belah tangan, hidung dan dua belah kaki beberapa kali sehari menjadikan badan sentiasa terpelihara daripada sebarang penyakit.

Keempat: Berdiri menghadap Allah SWT dengan keadaan suci dan bersih

Semasa menunaikan solat, seseorang hamba akan berhubung dan bermunajat dengan Tuhannya. Maka selayaknya dia berada dalam keadaan suci zahir dan batin, bersih hati dan badannya, kerana Allah SWT kasih kepada orang yang bersih dan batin dengan bersuci.

Air yang Boleh Dibuat Bersuci

Air yang boleh dibuat bersuci ialah air hujan, laut, perigi, sungai, mata air dan salji.

Semua air tersebut tergolong dalam dua kategori iaitu yang turun daripada langit dan air yang keluar daripada bumi. Firman Allah SWT:

Maksudnya: *Dan Kami menurunkan dari langit: Air yang bersih suci.*

(Surah al-Furqan: 48)

Firman-Nya lagi:

Maksudnya: *Dan (ingatlah ketika) ia menurunkan kepada kamu hujan dari langit untuk mensucikan kamu dengannya.*

(Surah al-Anfal: 11)

Manakala hadith Rasulullah SAW pula ialah, daripada Abu Hurairah RA katanya, seorang sahabat bertanya kepada Rasulullah SAW:

يَا رَسُولَ اللَّهِ إِنَّا نَرْكَبُ الْبَحْرَ وَنَحْمِلُ مَعَنَا الْقَلِيلَ مِنَ الْمَاءِ فَإِنْ تَوَضَّأْنَا بِهِ عَطَشْنَا أَفَتَتَوَضَّأُ بِمَاءِ الْبَحْرِ فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: هُوَ الطَّهُورُ مَاؤُهُ الْحِلُّ مِيتَتُهُ

Maksudnya: “Wahai Rasulullah! Kami belayar di laut, dan membawa air yang sedikit bersama-sama kami. Sekiranya kami berwudhu' dengannya kami akan dahaga. Adakah boleh kami berwudhu' dengan air laut? Rasulullah SAW menjawab: Airnya suci dan bangkainya halal.”

Air terbahagi kepada empat bahagian, iaitu suci dan menyucikan, suci dan menyucikan tetapi makruh menggunakannya, suci tetapi tidak menyucikan dan air yang bernajis.

1-Air yang Suci dan Menyucikan

Air yang suci lagi menyucikan ialah air mutlak yang kekal sifat asal kejadiannya yang dijadikan oleh Allah SWT. Air tersebut masih dikatakan air mutlak walaupun ia sudah berubah disebabkan lama terbiar atau disebabkan tanah, lumut dan tempat bertakung atau tempat mengalirnya mengandungi belerang.

Semua air itu dikatakan air mutlak. Ini kerana air tersebut sukar untuk dielakkan daripada perkara-perkara tersebut.

Dalil yang menunjukkan kesucian air mutlak ialah hadith.

Daripada Abu Hurairah RA katanya:

قَامَ أَعْرَابِيٌّ فَقَالَ فِي الْمَسْجِدِ فَقَامَ إِلَيْهِ النَّاسُ لِيَقْعُوا بِهِ ، فَقَالَ النَّبِيُّ صَلَّى اللَّهُ عَلَيْهِ وَسَلَّمَ: دَعُوهُ وَهَرِّقُوا عَلَى بَوْلِهِ سَجَلًا مِنْ مَاءٍ، أَوْ ذَنْوَبًا مِنْ مَاءٍ، فَإِنَّمَا بُعِثْتُمْ مُيسِّرِينَ، وَلَمْ تُبْعَثُوا مُعَسِّرِينَ

Maksudnya: “Seorang Badwi berdiri lalu kencing di dalam masjid, kemudian para sahabat pergi mencegahnya. Lantas Rasulullah SAW bersabda: Biarkan dia dan curahkanlah di atas air kencingnya setimba air. Sesungguhnya kamu dibangkitkan untuk memudahkan, bukan menyusahkan.”

Riwayat al-Bukhari dan Muslim

Perintah Rasulullah SAW supaya menjiruskan air ke tempat air kencing tersebut adalah dalil yang menunjukkan bahawa air tersebut mempunyai sifat menyucikan.

2-Air yang Suci dan Menyucikan Tetapi Makruh Menggunakannya

Air yang suci dan menyucikan tetapi makruh menggunakannya ialah air yang panas disebabkan cahaya matahari (مُسَّمًى). Ia makruh apabila memenuhi tiga syarat berikut:

- i. Ia berlaku di negeri bercuaca panas.
- ii. Air yang berada di dalam bekas yang diperbuat selain daripada emas dan perak seperti besi, tembaga dan semua galian yang ditempa.
- iii. Air tersebut digunakan pada badan manusia sekalipun mayat, atau pada haiwan yang boleh menyebabkan penyakit sopak seperti kuda.

Imam al-Syafie Rahimahullah meriwayatkan pandangan Sayyidina Umar RA yang tidak suka mandi dengan air tersebut, katanya: *“Aku tidak suka air musyammas kerana kesihatan.”* Kemudian Imam al-Syafie Rahimahullah meriwayatkan bahawa air tersebut boleh menyebabkan penyakit sopak. Ketajaman cahaya matahari akan meruapkan bau busuk ke atas permukaan air dan sekiranya terkena pada badan ketika masih panas ia boleh memudaratkan dan menyebabkan penyakit sopak.

3-Air yang Suci Tetapi Tidak Menyucikan

Air yang suci tetapi tidak menyucikan terbahagi kepada dua bahagian: Pertama: Air dengan jumlah yang sedikit yang telah digunakan untuk basuhan yang wajib ketika bersuci, seperti mandi dan wudhu'.

Kedua: Air mutlak yang bercampur dengan sesuatu yang suci yang kebiasaannya boleh dielakkan tetapi tidak boleh dipisahkan setelah bercampur seperti air teh dan seumpamanya.

Air Mutanajjis

Air *mutanajjis* ialah air yang jatuh atau terdapat najis ke dalamnya. Air ini terbahagi kepada dua bahagian.

Pertama: Air yang sedikit, iaitu kurang daripada dua *qullah*.

Air ini menjadi najis kerana terjatuh najis ke dalamnya walaupun sedikit dan tidak berubah sifat-sifatnya dari segi warna, bau dan rasa.

Dua *qullah* ialah bersamaan 500 kati Baghdad, atau bersamaan 192.857 kg atau 1 ¼ hasta padu. Dari segi ukuran 1¼ hasta segi empat panjang, lebar dan dalam berdasarkan hasta sederhana. Bagi bekas bulat pula seperti telaga 2 hasta dalam dan 1 hasta lebar. Menurut pendapat ulama' Hanbali, ukurannya ialah 2½ hasta dalam dan 1 hasta lebar.

Daripada Abdullah bin Umar R.Anhuma berkata: Aku mendengar Rasulullah SAW apabila disoal tentang air di padang pasir yang sering didatangi oleh binatang buas dan binatang-binatang lain, sabda Baginda:

ذَا كَانَ الْمَاءُ قُلَّتَيْنِ لَمْ يَحْمِلِ الْخَبَثَ

Maksudnya: “Apabila air itu cukup dua *qullah*, ia tidak kotor.”

Riwayat Abu Daud dan al-Tirmizi

Dalam riwayat Abu Daud:

فَأِنَّهُ لَا يَنْجُسُ

Maksudnya: “Sesungguhnya air itu tidak menjadi najis.”

Riwayat Abu Daud

Daripada hadith itu dapat kita difahami bahawa air yang kurang daripada dua *qullah* menjadi najis walaupun tidak berubah sifat-sifatnya. Kefahaman ini berdasarkan hadith Rasulullah SAW. Daripada Abu Hurairah RA, Nabi SAW bersabda:

إِذَا اسْتَيْقَظَ أَحَدُكُمْ مِنْ نَوْمِهِ فَلَا يَغْمِسْ يَدَهُ فِي الْإِنَاءِ حَتَّى يَغْسِلَهَا ثَلَاثًا فَإِنَّهُ لَا يَدْرِي
أَيْنَ بَاتَتْ يَدُهُ

Maksudnya: “Apabila seseorang daripada kamu bangun daripada tidur, janganlah dia mencelup tangannya di dalam bekas air, sehinggalah dia membasuh tangannya dahulu sebanyak tiga kali. Ini kerana dia tidak mengetahui tangannya di mana diletakkan.”

Riwayat Muslim

Rasulullah SAW melarang orang yang bangun daripada tidur mencelup tangannya ke dalam bekas berisi air kerana dikhuatiri mencemarinya dengan najis yang tidak kelihatan. Najis yang tidak kelihatan tidak akan mengubah keadaan air. Oleh itu jika tindakan tersebut tidak menajiskan air disebabkan menyentuhnya, Rasulullah SAW tidak akan melarang daripada berbuat demikian.

Kedua: Air yang banyak, iaitu yang cukup dua *qullah* atau lebih.

Air ini tidak menjadi najis kerana semata-mata terjatuh atau tersentuh najis, tetapi ia menjadi najis apabila air tersebut berubah satu daripada sifatnya, iaitu warna, rasa atau bau. Dalilnya ialah ijma' para ulama. Imam al-Nawawi ada menakalkan dalam kitabnya *al-Majmu'*, Ibn Munzir berkata: “Ulama telah bersepakat bahawa air yang sedikit atau banyak, apabila najis jatuh ke dalamnya dan berubah sama ada rasa, warna atau bau, maka air tersebut menjadi najis.”

Air yang Boleh Digunakan Untuk Bersuci

Keempat-empat jenis air yang dibincangkan diatas tidak semuanya boleh digunakan untuk bersuci, iaitu mengangkat hadas dan menghilangkan najis. Tetapi air yang boleh dibuat bersuci hanyalah jenis yang pertama (air mutlak) dan yang kedua air *musyammas*. Namun air jenis kedua itu makruh digunakan pada badan.

Sementara air jenis yang ketiga pula walaupun suci tidak boleh digunakan untuk bersuci. Ia hanyalah boleh digunakan untuk tujuan selain bersuci seperti minum, memasak dan sebagainya.

Bersuci terbahagi kepada dua jenis iaitu:

1. Bersuci daripada najis.
2. Bersuci daripada hadas.

Bersuci daripada Najis

Najis dari segi bahasa adalah semua benda yang kotor. Pada syara' pula bermaksud benda kotor yang menghalang sahnya solat, seperti darah dan kencing.

Benda-benda Najis

Benda-benda yang dikira najis adalah banyak. Dan yang paling utama

mempunyai tujuh perkara berikut:

1- Arak dan semua jenis cecair yang memabukkan. Hal ini berdasarkan firman Allah SWT:

Maksudnya: *Bahawa sesungguhnya arak, dan judi, dan pemujaan berhala, dan mengundi nasib dengan batang-batang anak panah, adalah (semuanya) kotor (keji).*

(Surah al-Maidah: 90)

Maksud *kotor* dalam ayat di atas ialah najis. Daripada Ibn Umar R.Anhuma, Rasulullah SAW bersabda:

كُلُّ مُسْكِرٍ خَمْرٌ وَأَنْ كُلَّ خَمْرٍ حَرَامٌ

Maksudnya: “Setiap yang memabukkan adalah arak dan setiap arak adalah *haram*.”

Riwayat Muslim

2- Anjing dan Babi.

Rasulullah SAW bersabda:

طَهِّرُوا إِنَاءَ أَحَدِكُمْ إِذَا وَلَغَ فِيهِ الْكَلْبُ أَنْ يَغْسِلَهُ سَبْعَ مَرَّاتٍ أُولَاهُنَّ بِالتُّرَابِ

Maksudnya: “Untuk membersihkan bejana kamu apabila dijilat anjing hendaklah kamu membasuhnya sebanyak tujuh kali. Basuhan pertama hendaklah dengan air bercampur tanah.”

Riwayat Muslim

Dalam riwayat yang lain:

إِحْدَاهُنَّ بِالْبُطْحَاءِ

Maksudnya: “Satu daripada basuhan tersebut adalah air yang bercampur dengan tanah.”

Riwayat al-Daraqutni

3- Bangkai

Bangkai semua binatang tidak halal yang mati dan binatang halal yang mati tanpa disembelih dengan cara syara'. Firman Allah SWT:

Maksudnya: *Diharamkan kepada kamu (memakan) bangkai (binatang yang tidak disembelih).*

(Surah al-Maidah: 3)

Termasuk juga dalam hukum bangkai adalah semua yang disembelih untuk berhala, dan yang disebut nama selain daripada nama Allah SWT. Firman Allah SWT:

Maksudnya: *Dan binatang-binatang yang disembelih kerana yang lain dari Allah.*

(Surah al-Maidah: 3)

Jenis-jenis Bangkai yang Dikecualikan

Terdapat tiga jenis bangkai yang dikecualikan sebagai najis:

I. Mayat manusia

Hal ini berdasarkan firman Allah SWT:

Maksudnya: *Dan sesungguhnya Kami telah memuliakan anak-anak Adam.*

(Surah al-Isra': 70)

Rasulullah SAW bersabda:

سُبْحَانَ اللَّهِ إِنَّ الْمُسْلِمَ لَا يَنْجُسُ

Maksudnya: “Maha Suci Allah, sesungguhnya orang Islam tidak najis.”

Riwayat al-Bukhari

II. Ikan

III. Belalang

Kedua-dua ini berdasarkan hadits, sabda Rasulullah SAW:

أُحِلَّتْ لَكُمْ مَيْتَتَانِ وَدَمَانِ فَأَمَّا الْمَيْتَتَانِ فَالْحُوتُ وَالْجَرَادُ وَأَمَّا الدَّمَانِ فَالْكَبِدُ وَالطَّحَالُ

Maksudnya: “Dihalalkan kepada kamu dua jenis bangkai dan dua jenis darah. Dua jenis bangkai tersebut ialah ikan dan belalang manakala dua jenis darah pula ialah hati dan limpa.”

Riwayat Ibn Majah

4- Darah yang cair termasuk nanah. Firman Allah

SWT:

Maksudnya: *Atau darah yang mengalir, atau daging babi kerana sesungguhnya ia adalah kotor.*
(Surah al-An'am: 145)

5-Air kencing dan najis manusia atau binatang.

Hal ini berdasarkan hadith, seorang Badwi terkencing di dalam masjid, lalu Rasulullah SAW bersabda:

صُبُّوا عَلَيْهِ ذُنُوبًا مِنْ مَّاءٍ

Maksudnya: *“Jiruskan ke atas kencing itu setimba air.”*

Riwayat al-Bukhari dan Muslim

Dalam hadith ini memerintahkan supaya menjirus air ke atas kencing menunjukkan bahawa kencing adalah najis.

6- Setiap bahagian yang terpisah daripada binatang semasa hidup adalah najis.

Hal ini berdasarkan hadith, Rasulullah SAW bersabda:

مَا قَطَعَ مِنْ بَهِيمَةٍ فَهُوَ مَيْتَةٌ

Maksudnya: *“Apa-apa yang dipotong daripada binatang adalah bangkai.”*

Riwayat al-Hakim

Rambut dan bulu binatang yang dagingnya halal dimakan dikecualikan daripada hukum tersebut. Ia adalah suci.

7- Susu binatang yang dagingnya tidak halal dimakan.

Susu binatang yang tidak halal dimakan dagingnya seperti keldai dan seumpamanya adalah najis. Ini kerana hukum susu adalah sama dengan dagingnya dan dagingnya adalah najis.

Najis ‘*Aini* dan Najis *Hukmi*

Najis Aini ialah semua najis yang berjirim yang boleh dilihat secara zahir iaitu warna atau bau seperti tahi, kencing dan darah.

Najis Hukmi ialah semua najis yang telah kering dan kesannya telah hilang atau tidak kelihatan kesan warna atau bau najis tersebut tidak ada lagi.

Contohnya baju yang terkena air kencing kemudian ia kering dan kesannya tidak zahir atau kelihatan lagi

Najis *Mughallazah*, Najis *Mukhaffafah* dan Najis *Mutawasitah*

Najis Mughallazah (مُعَاطَّة) ialah najis jenis berat, iaitu anjing dan babi.

Dalil menunjukkan najis ini jenis najis berat ialah kerana ia tidak memadai dengan sekali basuhan sahaja seperti najis-najis yang lain. Dalam hal ini, ia mestilah dibasuh dengan air sebanyak tujuh kali dan salah satunya menggunakan air yang bercampur dengan tanah.

Diqiaskan hukum babi kepada hukum anjing sebagai najis *mughallazah* kerana babi lebih buruk keadaannya daripada anjing.

Najis Mukhaffafah (مُخَفَّفَة) ialah najis ringan, iaitu air kencing kanak-kanak lelaki yang berumur kurang dari dua tahun dan hanya minum susu ibunya sahaja.

Dalil yang menunjukkan bahawa kencing tersebut najis ringan ialah memadai dibersihkan dengan merenjis air dan meratakannya walaupun tanpa mengalir airnya.

Hal ini berdasarkan sabda Rasulullah SAW, daripada Ummu Qais binti Mihsan R.Anha:

أَنَّهَا أَتَتْ بِابْنٍ لَهَا صَغِيرٍ، لَمْ يَأْكُلِ الطَّعَامَ إِلَى رَسُولِ اللَّهِ صَلَّى اللَّهُ عَلَيْهِ وَسَلَّمَ، فَبَالَ عَلَى ثَوْبِهِ، فَدَعَا بِمَاءٍ فَنَضَحَهُ وَلَمْ يَغْسِلْهُ

Maksudnya: “Dia menemui Rasulullah SAW dengan membawa anak lelakinya yang masih kecil dan tidak makan apa-apa makanan. Anak tersebut kencing di atas baju Baginda dan meminta air lalu merenjiskannya tanpa membasuhnya.”

Riwayat al-Bukhari dan Muslim

Najis *Mutawassitah* (مُتَوَسِّطَةٌ) ialah najis pertengahan, iaitu najis selain

Dari anjing dan babi dan kencing kanak-kanak lelaki dibawah umur 2 tahun yang tidak makan dan minum kecuali susu ibunya.

Contoh najis pertengahan ialah kencing manusia, najis haiwan, darah dan lain-lain. Ia dinamakan najis pertengahan kerana ia tidak suci dengan hanya merenjiskan air ke atasnya dan tidak pula wajib dibasuh berulang-ulang kali sekiranya najis tersebut sekiranya boleh dihilangkan dengan sekali basuhan.

Hadith daripada Ali RA katanya:

كُنْتُ رَجُلًا مَذَّاءً فَاسْتَحْيَيْتُ أَنْ أَسْأَلَ النَّبِيَّ صَلَّى اللَّهُ عَلَيْهِ وَسَلَّمَ فَأَمَرْتُ الْمِقْدَادَ بْنَ الْأَسْوَدِ فَسَأَلَهُ فَقَالَ: فِيهِ الْوُضُوءُ، وَلِمُسْلِمٍ: يَغْسِلُ ذَكَرَهُ وَيَتَوَضَّأُ

Maksudnya: “Aku seorang yang selalu keluar mazi dan aku berasa malu untuk bertanya kepada Rasulullah SAW. Aku menyuruh Miqdad bin al-Aswad menanyakannya. Baginda menjawab: Dia hendaklah berwudhu'. Dalam riwayat Muslim: Dia hendaklah membasuh zakarnya dan berwudhu'.”

Riwayat al-Bukhari dan Muslim

Cara Bersuci daripada Najis

Cara bersuci *najis mughallazah* ialah dibasuh dengan air sebanyak tujuh kali, dan satu daripadanya dengan air tanah sama ada najis tersebut najis *aini* atau *hukmi*, dan sama ada terkena pada pakaian, badan atau tempat.

Cara bersuci daripada najis *mukhaffafah* iaitu najis kencing kanak-kanak lelaki yang tidak makan sebarang makanan yang lain selain daripada susu ibu adalah dengan merenjisakan air sehingga rata ke tempat najis tersebut, sama ada najis tersebut najis *aini* atau *hukmi*, dan sama ada terkena pada badan, pakaian atau tempat.

Cara bersuci daripada najis *mutawassitah* iaitu najis selain daripada anjing, babi dan kencing kanak-kanak lelaki yang tidak makan sebarang makanan yang lain selain daripada susu ibu adalah dengan mengalirkan air ke atasnya dan menghilangkan kesan-kesannya hingga *ain* najis tersebut dan juga sifat-sifatnya, sama ada warna, rasa atau bau, sama ada najis *aini* atau *hukmi*, dan sama ada terkena pada pakaian, badan atau tempat. Namun demikian tiada masa jika warnanya masih kekal disebabkan susah untuk menghilangkannya seperti warna darah.

Cara Menyucikan Kulit Bangkai Selain Anjing dan Babi

Kulit bangkai tersebut disucikan dengan cara disamak, iaitu membuang segala lendir pada kulit dengan menggunakan bahan panas dan tajam hingga tidak lagi berbau busuk dan rosak jika sekiranya direndam di dalam air. Ini berdasarkan hadith, Rasulullah SAW bersabda:

Maksudnya: “Apabila kulit disamak, maka ia menjadi suci.”

إِذَا دُبِغَ الْإِهَابُ فَقَدْ طُهِرَ

Riwayat Muslim

Selepas disamak, kulit tersebut wajib dibasuh semula dengan air disebabkan bahan-bahan yang najis yang digunakan untuk menyamakanya atau bahan-bahan yang menjadi najis disebabkan terkena kulit yang belum suci ketika disamak.

Sebahagian Najis yang Dimaafkan

Antara najis yang dimaafkan ialah:

1-Percikan kencing yang sedikit yang tidak dapat dilihat sama ada pada pakaian atau badan, sama ada najis tersebut *mughallazah*, *mukhaffafah* atau *mutawassitah*.

2- Sedikit darah, nanah, darah kutu anjing dan najis lalat. Sekiranya ia bukan perbuatan manusia dan tidak disengajakannya.

3-Darah luka atau nanah walaupun banyak dengan syarat ia terjadi pada dirinya sendiri, bukan daripada perbuatannya dan tidak disengajakannya, serta tidak terkena ke tempat lain.

4- Najis binatang yang mengenai bijian. Begitu juga najis binatang ternakan yang mengenai susu ketika memerahnya, dengan syarat najis itu tidak banyak sehingga mengubah sifat susu tersebut.

5- Najis ikan di dalam air selagi air tersebut tidak berubah. Begitu juga najis burung di tempat-tempat yang ia selalu berulang-alik seperti kawasan tanah suci Makkah, Madinah dan Jami' Umawi di Syria. Ini disebabkan kesulitan umum (عُـمُومٌ بَلَوَى) dan sukar untuk mengelakkannya.

6- Darah yang mengenai baju penyembelih sekiranya sedikit.

7- Darah yang melekat pada daging.

8- Mulut kanak-kanak yang terdapat kesan najis muntah apabila dia menghisap susu ibunya.

9- Debu jalan.

10- Bangkai binatang yang tidak berdarah seperti lebah, lalat dan semut, apabila terjatuh ke dalam sesuatu cecair, dengan syarat ia terjatuh dengan sendirinya dan tidak mengubah sifat-sifat cecair tersebut

Istinja' dan Adab-adabnya

Istinja' bermaksud menghilangkan najis atau mengurangkannya daripada tempat keluar air kecil atau air besar.

Perkataan istinja' diambil daripada (نَجَاءٌ), (نَجْوَةٌ) atau (نَجْوٍ). *Naja'* (نَجَاءٌ) bermaksud selamat dan terlepas daripada sebarang penyakit. Dinamakan perbuatan tersebut dengan istinja' di-sisi syara' kerana orang beristinja' berusaha untuk melepaskan dirinya daripada sesuatu yang menyakitkan. Pada kebiasaannya istinja' dilakukan di tempat yang tertutup seperti di belakang tanah tinggi dan seumpamanya.

Hukum istinja' adalah wajib, ini berdasarkan kepada sabda Rasulullah SAW yang akan dibahaskan nanti.

Benda-benda yang Boleh Digunakan untuk Beristinja'

Harus beristinja' menggunakan air mutlak. Ia merupakan cara yang asal untuk bersuci daripada najis. Begitu juga harus beristinja' dengan menggunakan semua bahan kesat dan boleh menghilangkan najis seperti batu, daun dan seumpamanya.

Cara istinja' yang *afdhal* ialah beristinja' dengan menggunakan batu dan seumpamanya terlebih dahulu, kemudian menggunakan air selepas itu. Ini kerana penggunaan batu terlebih dahulu dalam menghilangkan *ain* najis dan air yang digunakan selepasnya pula akan menghilangkan kesan-kesannya tanpa bercampur dengan *ain* najis tersebut.

Sekiranya ingin menggunakan satu daripada kedua-duanya maka air adalah *afdhal* kerana ia sahaja yang boleh menghilangkan *ain* najis dan kesan-kesannya berbanding dengan menggunakan benda-benda yang lain.

Sekiranya menggunakan batu sahaja dan seumpamanya maka disyaratkan bahan yang digunakan itu kering. Batu itu hendaklah digunakan sebelum najis yang keluar daripada *qubul* dan *dubur* itu menjadi kering atau tidak mengalir keluar daripada kawasan punggung atau kepala zakar dan tempat keluar kencing orang perempuan.

Sehubungan itu, disyaratkan sekurang-kurangnya sapuan adalah dengan tiga biji batu atau benda-benda lain yang boleh digunakan untuk beristinja'. Sekiranya masih belum bersih, tambahlah bilangannya, dan sunat dengan bilangan yang ganjil seperti lima, tujuh dan seterusnya.

Hadith seterusnya, daripada Ibn Mas'ud RA berkata:

أَتَى النَّبِيَّ صَلَّى اللَّهُ عَلَيْهِ وَسَلَّمَ الْغَائِطَ، فَأَمَرَنِي أَنْ آتِيَهُ بِثَلَاثَةِ أَحْجَارٍ

Maksudnya: “Nabi SAW pergi ke lurah untuk buang air, kemudian Baginda menyuruh aku membawa tiga biji batu kepadanya.”

Riwayat al-Bukhari

Benda-benda yang Tidak Boleh Digunakan untuk Beristinja’

Tidak harus istinja’ dengan benda-benda najis atau yang terkena najis kerana kemungkinan boleh menambahkan kesan najisnya yang sepatutnya dikurangkan.

Haram beristinja’ dengan makanan manusia seperti roti dan lain-lain atau dengan makanan jin seperti tulang.

Seterusnya dalam riwayat, Rasulullah SAW bersabda:

لَا تَسْتَنْجُوا بِالرَّوْثِ وَلَا بِالْعِظَامِ فَإِنَّهُ زَادَ إِخْوَانَكُمْ مِنَ الْجِنِّ

Maksudnya: “Janganlah beristinja’ dengan tahi dan tulang binatang. Sesungguhnya tulang adalah bekalan saudara-saudara kamu daripada golongan jin.”

Riwayat al-Tirmizi (18)

Diqiaskan makanan jin kepada makanan manusia adalah lebih utama diharamkan beristinja' dengannya. Haram beristinja' dengan sesuatu yang dihormati, contohnya anggota binatang seperti tangan dan kaki yang belum terpisah daripada badannya. Begitu juga anggota manusia lebih utama diharamkan kerana perbuatan tersebut bertentangan dengan kemuliaannya.

Harus digunakan untuk beristinja' bahagian anggota binatang yang terpisah daripada badannya seperti bulu binatang yang dagingnya halal dimakan dan kulit bangkai yang telah disamak.

Adab Buang Air dan Beristinja'

Adab-adab yang dituntut atas orang Islam melakukannya ketika buang air dan beristinja' ialah:

Pertama: Adab yang berkaitan dengan tempat buang air, iaitu hendaklah menjauhi tempat yang berikut ketika buang air kecil atau besar.

- Laluan orang ramai atau tempat duduk yang menyebabkan mereka terganggu.
- Di lubang tanah, tembok atau seumpamanya.
- Di bawah pokok yang sedang berbuah untuk mengelakkan buah tercemar dan menjijikkan
- Di dalam air yang tenang dan tidak mengalir.

Ini adalah kerana manusia akan berasa jijik dengan air tersebut sekalipun air itu banyak dan tidak berubah sifatnya. Sekiranya air itu berubah ia akan terbuang begitu saja, apatah lagi air itu kurang daripada dua *qullah*.

Sehubungan itu buang air besar adalah lebih berat keadaannya dan lebih utama dilarang. Larangan di sini adalah dengan makna makruh tetapi Imam al-Nawawi menyatakan bahawa ia memberi makna haram.

Bersuci daripada Hadas

Hadas dari segi sudut bahasa adalah sesuatu kejadian manakala pada syara' ialah kejadian yang dianggap wujud (إِعْتِبَارِيّ) pada anggota manusia yang menghalang sah solat dan ibadat yang lain yang bersamaan hukumnya selagi tidak diberikan keringanan (رُخْصَة).

Hadas juga dimaksudkan kepada perkara yang membatalkan wudhu' dan yang mewajibkan mandi.

Pembahagian Hadas

Hadas terbahagi kepada dua, iaitu hadas kecil dan hadas besar.

Hadas kecil adalah kejadian yang dianggap wujud pada empat anggota manusia, iaitu muka, dua tangan, kepala dan dua kaki yang menghalang daripada sah solat dan seumpamanya. Hadas ini akan terangkat atau luput dengan berwudhu' dan membolehkan seseorang melakukan solat dan seumpamanya.

Hadas besar ialah kejadian yang dianggap wujud pada seluruh badan yang menghalang sah solat dan ibadat-ibadat seumpamanya. Hadas ini akan terluput dengan mandi dan menjadikan seseorang layak untuk melakukan ibadat yang telah dilarang sebelumnya.

WUDHU

Pengertian Wudhu'

Wudhu' berasal daripada perkataan *wadha'ah* (وَضَاءَةٌ). Dari segi bahasa, ia bererti elok dan berseri. Sementara dari segi syara' pula ialah perbuatan menggunakan air pada anggota-anggota tertentu beserta dengan niat.

Ia dinamakan demikian kerana perbuatan tersebut mengelokkan dan menyerikan anggota yang dibasuh dan dibersihkan. Perkataan *wadhu'* (وَضُوءٌ) ialah nama air yang digunakan untuk berwudhu'.

Rukun Wudhu'

Rukun wudhu' enam perkara iaitu niat, membasuh muka, membasuh dua belah tangan hingga siku, menyapu sebahagian daripada kepala, membasuh kedua kaki hingga buku lali dengan tertib. Dalil disyariatkan wudhu' dan rukunnya berdasarkan firman Allah SWT:

Maksudnya: *Wahai orang-orang yang beriman, apabila kamu hendak mengerjakan sembahyang (padahal kamu berhadas kecil), maka (berwudhu'lah) iaitu basuhlah muka kamu, dan kedua belah tangan kamu meliputi siku, dan sapulah sebahagian dari kepala kamu, dan basuhlah kedua belah kaki kamu meliputi buku lali.*

(Surah al-Maidah: 6)

Pertama: Niat.

Niat menjadi rukun kerana wudhu' adalah ibadat dan ia membezakan ibadat dan adat. Hal ini berdasarkan hadith, sabda Rasulullah SAW:

إِنَّمَا الْأَعْمَالُ بِالنِّيَّاتِ، وَإِنَّمَا لِكُلِّ امْرِئٍ مَا نَوَىٰ

Maksudnya: “Sesungguhnya amalan itu adalah dengan niat, dan setiap orang hanya mendapat apa yang diniatkan.”

Riwayat al-Bukhari (1) dan Muslim (1907)

Tidak sah ibadat dan tidak diambil kira oleh syara' melainkan apabila adanya niatkan. Seseorang *mukallaf* tidak akan mendapat pahala ibadatnya kecuali dengan niat yang betul.

Pengertian Niat

Niat pada bahasa bererti tujuan, manakala pada syara' pula ialah menyatakan tujuan sesuatu perbuatan ketika melakukannya. Tempat niat adalah di dalam hati dan ia sunat dilafazkan. Cara berniat adalah berkata di dalam hati:

Sahaja aku berwudhu' (نَوَيْتُ فَرْضَ الْوُضُوءِ),

atau *sahaja aku mengangkat hadas* (رَفَعَ الْحَدَثِ نَوَيْتُ),

atau *sahaja aku mengharuskan solat* (نَوَيْتُ اسْتِباحَةَ الصَّلَاةِ).

Waktu berniat ialah ketika mula membasuh bahagian muka kerana ia adalah permulaan berwudhu'.

Kedua: Membasuh muka kesemuanya.

Bahagian muka secara menegak adalah bermula daripada tempat tumbuh rambut hingga bahagian bawah dagu, manakala secara melintang pula adalah daripada bahagian telinga ke telinga. Oleh itu, wajib membasuh kesemua yang ada di atas bahagian muka termasuk luar dan dalam bulu kening, misai dan janggut kecuali janggut yang tebal yang tidak nampak bahagian dalamnya, memadai membasuh yang luarannya sahaja.

firman Allah SWT dengan Maksudnya:

Maka (berwudhu'lah) iaitu basuhlah mukamu

(Surah al-Maidah: 6)

Ketiga: Membasuh dua belah tangan sehingga siku.

Hal ini berdasarkan firman Allah SWT:

Maksudnya: *Dan kedua belah tangan kamu meliputi siku.*

(Surah al-Maidah: 6)

Siku ialah sendi di antara bahagian lengan dan pangkal lengan, dan termasuk antara anggota yang mesti dibasuh ketika berwudhu'. Hal ini berdasarkan hadith, daripada Abu Hurairah RA:

أَنَّهُ تَوَضَّأَ فَغَسَلَ وَجْهَهُ فَأَسْبَغَ الْوُضُوءَ ثُمَّ غَسَلَ يَدَهُ الْيُمْنَى حَتَّى أَشْرَعَ فِي الْعَضِدِ ثُمَّ
يَدَهُ الْيُسْرَى حَتَّى أَشْرَعَ فِي الْعَضِدِ ثُمَّ مَسَحَ رَأْسَهُ ثُمَّ غَسَلَ رِجْلَهُ الْيُمْنَى حَتَّى أَشْرَعَ
فِي السَّاقِ ثُمَّ غَسَلَ رِجْلَهُ الْيُسْرَى حَتَّى أَشْرَعَ فِي السَّاقِ ثُمَّ قَالَ هَكَذَا رَأَيْتُ رَسُولَ
اللَّهِ صَلَّى اللَّهُ عَلَيْهِ وَسَلَّمَ يَتَوَضَّأُ

Maksudnya: “Dia berwudhu' dengan membasuh mukanya dengan sempurna. Kemudian membasuh tangan kanan, kemudian tangan kiri hingga bahagian lengan, menyapu kepala dan membasuh kaki kanan kemudian kaki kiri sehingga bahagian betis. Kemudian dia berkata: Demikianlah aku melihat Rasulullah SAW berwudhu'.”

Riwayat Muslim

Wajib meratakan basuhan kesemua bulu dan kulit. Sekiranya terdapat kotoran di bawah kuku atau memakai cincin yang menghalang air sampai ke kulit maka wudhu' tidak sah.

Hadith seterusnya:

أَنَّ رَجُلًا تَوَضَّأَ فَتَرَكَ مَوْضِعَ ظُفْرِ عَلَى قَدَمِهِ فَأَبْصَرَهُ النَّبِيُّ صَلَّى اللَّهُ عَلَيْهِ وَسَلَّمَ فَقَالَ:
ارْجِعْ فَأَحْسِنْ وُضُوءَكَ فَرَجَعَ ثُمَّ صَلَّى

Maksudnya: “Seorang lelaki berwudhu' dan telah tertinggal basuhan pada kuku kakinya yang dilihat oleh Rasulullah SAW, lalu Baginda bersabda: Ulanglah semula dan berwudhu'lah dengan sempurna. Lalu dia terus mengulangnya dengan sempurna dan mendirikan solat.”

Riwayat Muslim (243)

Hadith di atas menunjukkan bahawa wudhu' tidak sah sekiranya terdapat anggota yang wajib dibasuh tetapi tidak berbasuh walaupun sedikit

Keempat: Menyapu sebahagian daripada kepala

Walaupun sehelai rambut selama ia berada di dalam kawasan kepala. Hal ini berdasarkan firman Allah SWT:

Maksudnya: *Dan sapulah sebahagian dari kepala kamu.*

(Surah al-Maidah: 6)

Dan juga berdasarkan hadith, al-Mughirah bin Syu'bah RA meriwayatkan:

Maksudnya: *“Rasulullah SAW berwdudhu' lalu Baginda menyapu ubun-ubunnya dan di atas serbannya.”*

Riwayat Muslim

Membasuh kepala atau sebahagiannya sebagai ganti kepada menyapunya adalah harus. Ubun-ubun ialah bahagian atas kepala dan ia adalah sebahagian daripadanya. Perbuatan menyapu ubun-ubun sahaja menunjukkan bahawa menyapu mana-mana bahagian kepala adalah memadai.

Keempat: Menyapu sebahagian daripada kepala

Walaupun sehelai rambut selama ia berada di dalam kawasan kepala. Hal ini berdasarkan firman Allah SWT:

Maksudnya: *Dan sapulah sebahagian dari kepala kamu.*

(Surah al-Maidah: 6)

Dan juga berdasarkan hadith, al-Mughirah bin Syu'bah RA meriwayatkan:

Maksudnya: *“Rasulullah SAW berwdudhu' lalu Baginda menyapu ubun-ubunnya dan di atas serbannya.”*

Riwayat Muslim

Membasuh kepala atau sebahagiannya sebagai ganti kepada menyapunya adalah harus. Ubun-ubun ialah bahagian atas kepala dan ia adalah sebahagian daripadanya. Perbuatan menyapu ubun-ubun sahaja menunjukkan bahawa menyapu mana-mana bahagian kepala adalah memadai.

Kelima: Membasuh dua belah kaki hingga buku lali.

Hal ini berdasarkan firman Allah SWT:

Maksudnya: *Dan basuhlah kedua belah kaki kamu meliputi buku lali.*

(Surah al-Maidah: 6)

Buku lali ialah tulang yang timbul di bahagian sendi di antara betis dan tapak kaki. Ia wajib dibasuh bersama-sama kedua-dua belah kaki sebagaimana dinyatakan dalam hadith riwayat Abu Hurairah RA yang terdahulu. Oleh itu, wajib meratakan basuhan di kedua-dua belah kaki hingga tidak tertinggal sedikit pun sama ada di kuku atau di bawah bulu roma sebagaimana keterangan cara-cara membasuh tangan yang lalu.

Keenam: Tertib Mengikut Urutan Rukun yang Telah Dinyatakan

Hal ini berdasarkan ayat-ayat yang menyebut fardhu-fardhu wudhu' secara

berurutan dan juga berdasarkan perbuatan Rasulullah SAW. Baginda tidak berwudhu' melainkan dilakukannya secara tertib sebagaimana susunan yang dinyatakan di dalam al-Quran. Perbuatan Baginda adalah *thabit* dalam beberapa hadith yang sahih. Antaranya ialah hadith Abu Hurairah RA yang lalu terdapat di dalamnya perkataan *kemudian* yang memberi makna tertib sebagaimana yang disepakati oleh ulama'.

Sunat Wudhu'

Antara sunat wudhu' yang penting ialah:

- i. Menyebut nama Allah (بِسْمِ اللَّهِ)
- Sunat menyebut nama Allah SWT pada permulaan wudhu'.
- ii. Membasuh dua belah tapak tangan sebanyak tiga kali sebelum memasukkannya ke dalam bekas air
- iii. Bersuci
- iv. Berkumur-kumur dan memasukkan air ke dalam hidung dengan tangan kanan dan mengeluarkannya dengan tangan kiri
- vi. Menyelati janggut yang tebal
- vii. Menyapu seluruh kepala
- viii. Menyelati celah-celah jari kedua-dua belah tangan dan kaki

Cara menyelati jari-jari tangan adalah dengan memasukkan jari-jari kedua-dua belah tangan antara satu sama lain. Sementara cara menyelati jari-jari kaki pula adalah dengan menggunakan jari kelingking tangan kiri, bermula dari jari kelingking kaki kanan dan berakhir pada jari kelingking kaki kiri.

viii. Menyapu dua telinga luar dan dalam dengan air yang lain selain daripada air buat menyapu kepala

ix. Melakukan semua perbuatan fardhu wudhu' dan sunatnya sebanyak tiga kali

x. Mendahulukan yang kanan daripada yang kiri ketika membasuh tangan dan kaki

xi. Menggosok-gosok tangan atas anggota ketika membasuhnya

xii. Berturut-turut:Membasuh semua anggota wudhu' secara berturutan tanpa berhenti, iaitu membasuh anggota yang kedua sebelum anggota yang pertama kering kerana mengikut perbuatan Nabi SAW sebagaimana yang dinyatakan dalam hadith-hadith yang lepas.

xiii. Melembihkan basuhan muka ke bahagian kepala dan membasuh bahagian atas dua siku dan buku lali

xiv. Bersederhana menggunakan air tanpa berlebih-lebihan dan tidak membazir

xv. Menghadap kiblat ketika berwudhu'. Ini kerana kiblat merupakan arah yang paling mulia

xvi. Tidak bercakap-cakap ketika berwudhu'. Ini kerana mengikut perbuatan Rasulullah SAW

xvii. Tasyahhud dan berdoa setelah selesai berwudhu'

Perkara Makruh Ketika Berwudhu'

Perkara-perkara yang makruh ketika berwudhu' ialah:

- i. Menggunakan air secara berlebihan atau membazirkan air.
- ii. Mendahulukan basuhan tangan dan kaki kiri daripada yang kanan.
- iii. Mengelap anggota wudhu' dengan tuala kecuali keuzuran kerana sangat sejuk atau panas yang menyakitkan sekiranya air masih ada pada anggota, atau dikhuatiri anggota tersebut terkena najis atau debunya.
- iv. Menyimbah air ke muka kerana perbuatan itu bertentangan dengan kemuliaan muka tersebut.
- v. Membasuh atau menyapu anggota wudhu' lebih atau kurang daripada 3 kali dengan yakin.
- vi. Meminta bantuan orang lain membasuh anggota wudhu'nya tanpa uzur kerana ia melambangkan sifat takabbur yang berlawanan dengan sifat kehambaan.
- vii. Melampau berkumur dan memasukkan air ke dalam hidung bagi orang yang berpuasa, kerana dikhuatiri air tersebut akan sampai ke halkum menyebabkan puasanya terbatal.

Perkara yang Membatalkan Wudhu'

Wudhu' terbatal dengan lima perkara:

- i. **Semua yang keluar daripada qubul dan dubur seperti kencing, tahi, darah, kentut dan lain-lain.**

Hal ini berdasarkan firman Allah SWT:

Maksudnya: Atau salah seorang di antara kamu datang dari tempat buang air.

(Surah al-Nisa': 43)

Diqiaskan perkara yang tersebut dengan semua benda yang keluar daripada qubul dan dubur sekalipun suci.

- ii. **Tidur yang tidak tetap.**

Maksud tetap di sini ialah duduk dalam keadaan punggung bertaup rapat dengan lantai manakala maksud tidak tetap pula ialah terdapat rongga di antara punggung dan lantai.

Adapun orang yang tidur dalam keadaan duduk yang tetap, wudhu'nya tidak batal kerana dia akan terasa sesuatu yang keluar daripada duburnya.

- iii. **Hilang akal disebabkan sama ada mabuk, pitam, sakit atau gila.**

Apabila satu daripada perkara tersebut berlaku kepada seseorang, maka dikhuatiri sesuatu keluar daripada qubul atau duburnya tanpa disedari. Hal ini diqiaskan dengan tidur kerana hilang akal itu lebih berat daripadanya.

- iv. **Seseorang lelaki menyentuh isterinya atau perempuan lain tanpa berlapik.**

Perbuatan tersebut membatalkan wudhu' kedua-duanya. Maksud perempuan lain ialah perempuan yang halal berkahwin.

Hal ini berdasarkan firman Allah SWT dalam menerangkan perkara- perkara

yang mewajibkan berwudhu':

Maksudnya: Atau kamu bersentuh dengan perempuan.

(Surah al-Nisa': 43)

Berdasarkan bacaan mutawattir perkataan bermakna iaitu kamu menyentuhnya.

v. Menyentuh kemaluan manusia. Sama ada diri sendiri atau orang lain, sama ada qubul atau dubur dengan tapak tangan dan perut-perut jari tanpa berlapik

Mandi, Hukum dan Bahagiannya

Pengertian Mandi

Mandi pada bahasa bermaksud mengalirkan air ke atas apa-apa sahaja. Manakala pada syara' pula adalah mengalirkan air ke atas badan dengan niat yang tertentu.

Pensyariatan Mandi

Mandi telah disyariatkan oleh Allah SWT sama ada untuk kebersihan ataupun mengangkat hadas dan sama ada ia menjadi syarat sah ibadat ataupun tidak.

Dalil Pensyariatan Mandi Dalil al-Quran

Firman Allah SWT:

Maksudnya: Sesungguhnya Allah mengasihi orang-orang yang banyak bertaubat, dan mengasihi orang-orang yang sentiasa mensucikan diri.¹⁵

(Surah al-Baqarah: 222)

Ertinya, Allah suka kepada orang yang bersih daripada hadas dan kekotoran, sama ada kekotoran zahir atau batin.

Dalil al-Sunnah

Terdapat banyak hadith tentang mandi. Antaranya ialah, daripada Abu Hurairah RA katanya, Rasulullah SAW bersabda:

Maksudnya: “Setiap muslim mesti mandi sekali dalam tujuh hari dengan membasuh kepala dan tubuh badannya.” Menurut riwayat Muslim: “Sebagai kewajipan terhadap Allah.”

(Riwayat al-Bukhari dan Muslim)

Ulama' menyatakan bahawa mandi sekali dalam seminggu itu adalah pada hari Jumaat. Dalil yang lebih lanjut akan dijelaskan kemudian.

Dalil Ijma'

Ulama' mujtahid sepakat menghukumkan mandi kerana kebersihan adalah sunat, manakala mandi yang menjadi syarat sah ibadat adalah wajib. Tiada perbezaan pendapat ulama' dalam hal ini.

Hikmah Pensyariatan Mandi

Mandi mempunyai hikmah dan faedah yang banyak, antaranya ialah:

i. Mendapat pahala.: Mandi mengikut pengertian syara' adalah ibadat. Hal ini kerana melaksanakan perintah syara', dan beramal dengan hukumnya. Ia diberikan pahala yang besar.

Bersuci ini pula termasuk wudhu' dan mandi.

ii. Menghasilkan kebersihan: Apabila seseorang muslim itu mandi, dia dapat membersihkan kekotoran yang melekat pada badan atau peluh yang keluar daripada tubuh. Tubuh badan yang bersih ini boleh menghindarinya daripada kuman-kuman yang menyebabkan penyakit. Bau tubuh badannya pula menimbulkan kemesraan dan kasih sayang sesama manusia.

iii. Menghasilkan Kecergasan: Mandi boleh menjadikan tubuh badan cergas dan aktif, hilang rasa lesu dan malas terutamanya selepas berlaku sebab-sebab yang mewajibkannya seperti jima' yang akan dijelaskan nanti.

Bahagian Mandi

Mandi terbahagi kepada dua, iaitu mandi wajib dan mandi sunat.

i. Mandi Wajib

Mandi wajib adalah mandi yang tidak sah ibadat tanpanya apabila terdapat sebab-sebab yang mewajibkan mandi. Sebab-sebabnya ialah janabah, haidh, bersalin dan mati.

Janabah

Makna asal janabah ialah jauh, sebagaimana firman Allah SWT:

Maksudnya: (Maka pergilah ia) lalu dilihatnya dari jauh.

(Surah al-Qasas: 11)

Janabah bermaksud air mani yang terpancut atau persetubuhan. Oleh itu orang yang junub ialah orang yang tidak suci disebabkan keluar mani atau persetubuhan. Ia dinamakan junub kerana orang yang berjanabah menjauhkan diri daripada mendirikan solat selama dia berkeadaan demikian. Perkataan junub digunakan untuk umum, sama ada untuk lelaki atau perempuan, dan sama ada seorang atau ramai.

Sebab Janabah

Janabah disebabkan oleh dua perkara:

Pertama: Keluar mani, sama ada di kalangan lelaki atau perempuan dengan apa-apa sebab sekalipun sama ada dengan bermimpi, bercumbuan, melihat seseorang dengan berahi atau berkhayal.

Dinyatakan di sini, dua jenis air yang keluar selain daripada mani.

i. Mazi

Air mazi adalah cecair berwarna putih jernih melekit dan keluar di saat timbul syahwat dan juga tanpa syahwat. Keluarnya tidak dengan cara memancut dan tidak diikuti dengan rasa letih. Kadang-kadang seseorang tidak merasai mazinya keluar sebagaimana dia merasai maninya keluar. Mazi lelaki dan wanita sama sahaja dan tidak ada beza. Malah, mazi akan keluar daripada alat kelamin seseorang wanita apabila timbul syahwat pada dirinya.

ii. Wadi

Air wadi pula ialah cecair berwarna putih telur tebal dan tidak ubah seperti mani, tetapi tidak ada bau. Biasanya keluar selepas membuang air kecil atau ketika memikul beban yang berat. Biasanya juga keluar dalam bentuk satu atau dua titis sahaja. Para ulama' ijma' tidak wajib mandi junub kerana keluar mazi dan juga wadi.

Keluar Cairan yang Tidak Jelas Sama Ada Mani atau Mazi

Menurut al-Syeikh Taqiyudin al-Husaini dari kalangan ulama' mazhab al-Syafie, kalau seseorang ragu-ragu tentang kesan lembapan yang terdapat pada pakaiannya, adakah air mani atau mazi, boleh memilih mana yang dia lebih yakin dan membina hukum berasaskan kepada apa yang lebih diyakini itu. Jika dia yakin lembapan itu adalah air mani kerana mempunyai ciri-ciri mani, wajib ke atasnya mandi, kerana dia dikira berada dalam keadaan berjunub dan jika dia yakin lembapan tersebut hanyalah air mazi, tidak perlu kepadanya mandi kerana dia tidak berada di dalam keadaan berjunub, sebaliknya cukuplah dicuci pakaian tersebut.

Kedua: Jima' walaupun tidak keluar mani.

Hadith daripada Aisyah R.Anha:

Maksudnya: “Dan apabila bertemu alat kelamin lelaki dan alat kelamin perempuan (bersetubuh), mereka berdua wajib mandi.”

Riwayat Muslim

Dalam hadith ini pasangan lelaki dan perempuan wajib mandi kerana kedua-duanya berkongsi sebab yang mewajibkan mandi.¹⁹

TAYAMMUM

Sebagaimana diketahui wudhu' merupakan syarat sah solat, tawaf dan syarat harus menanggung al-Quran. Begitu juga berwudhu' hanyalah dengan air, tetapi manusia kadang-kadang terhalang daripada menggunakannya sama ada sebab ketiadaannya, kedudukannya yang jauh atau disebabkan penyakit. Islam mensyariatkan tayammum dengan debu tanah yang suci sebagai ganti kepada wudhu' dan mandi supaya orang Islam tidak terhalang daripada mendapat keberkatan beribadat.

Pengertian Tayammum

Tayammum dari segi bahasa bererti tujuan. Sementara pada syara' pula adalah menyapukan debu tanah yang suci ke muka dan dua tangan dengan niat dan cara yang tertentu.

Dalil Pensyariatannya

Pensyariatannya tayammum adalah berdasarkan al-Quran dan al-Sunnah. Adapun dalil al-Quran ialah firman Allah SWT:

Maksudnya: Dan jika kamu junub (berhadass besar) maka bersucilah dengan mandi wajib, dan jika kamu sakit (tidak boleh kena air), dalam pelayaran, salah seorang dari kamu datang dari tempat buang air, atau kamu sentuh perempuan, sedang kamu tidak mendapat air (untuk berwudhu' dan mandi), maka hendaklah kamu bertayammum dengan tanah, debu yang

bersih, iaitu: Sapulah muka kamu dan kedua belah tangan kamu dengan tanah debu itu.²⁵

(Surah al-Maidah: 6)

Dalil hadith pula ialah, Rasulullah SAW bersabda:

Maksudnya: “Dijadikan bagi kita seluruh bumi tempat sujud, dan tanahnya pula bahan bersuci ketika ketiadaan air.”

Riwayat Muslim

Sebab Tayammum

Terdapat beberapa sebab yang mengharuskan tayammum:

i. Air benar-benar tidak ada. Contohnya seseorang pengembara yang tidak mendapati air ketika dalam perjalanannya. Begitu juga air tidak ada secara syara'.

Contohnya seseorang yang mempunyai air tetapi dia memerlukan untuk minum. Firman Allah SWT:

Maksudnya: Sedang kamu tidak mendapat air (untuk berwudhu' dan mandi), maka hendaklah kamu bertayammum.

(Surah al-Maidah: 6)

ii. Jarak tempat yang ada air jauh daripadanya. Apabila seseorang berada dari tempat yang berair melebihi dua kilometer setengah (2.5 km), dia bolehlah bertayammum dan tidak wajib pergi ke tempat tersebut kerana menyusahkannya.

iii. Terhalang daripada menggunakan air sama ada halangan yang nyata, seperti ada air di tempat yang berhampiran tetapi tidak jauh dari situ pula ada musuh yang ditakuti, ataupun ada halangan syara', iaitu seperti takut menggunakan air kerana bimbang terkena penyakit, dan melambatkan proses penyembuhan. Dalam keadaan yang demikian, dia bolehlah bertayammum dan tidak wajib menggunakan air.

iv. Cuaca yang sangat sejuk hingga tidak sanggup menggunakan air dan tidak pula mampu memanaskannya. Hal ini berdasarkan perbuatan 'Amr bin al-'As RA yang bertayammum disebabkan janabah. Dia berbuat demikian kerana bimbang akan memudharatkan dirinya disebabkan cuaca sejuk. Perbuatan ini telah diperakui oleh Rasulullah SAW. Akan tetapi orang yang bersolat dalam keadaan demikian hendaklah mengqadha'nya apabila ada air yang boleh digunakannya.

Syarat-syarat Tayammum

- i. Mengetahui masuk waktu solat.
- ii. Mencari air selepas masuk waktu solat.
- iii. Menggunakan debu tanah yang suci yang tidak mengandungi tepung dan kapur.
- iv. Menghilangkan najis terlebih dahulu.
- v. Menentukan kiblat sebelum bertayammum.

Rukun Tayammum

Rukun tayammum ada tiga:

- i. Berniat. Tempat niat di dalam hati. Oleh itu seseorang hendaklah berniat dalam hatinya perbuatan tayammum tersebut, malah sunat melafazkannya dengan kata, sahaja aku mengharuskan solat, solat *fardhu*, solat sunat dan seumpamanya yang hendak dilakukannya. Apabila seseorang bertayammum dengan niat mengharuskan yang *fardhu*, dia boleh melakukan beberapa amalan sunat yang lain bersamanya.

ii. Menyapukan debu tanah ke muka dan kedua-dua belah tangan hingga siku dengan dua kali tepukan, yakni menepukkan dua tangan ke atas debu tanah yang suci dan menyapukannya ke seluruh muka. Kemudian menepukkannya lagi ke atas debu tanah tersebut dan menyapukannya pula pada kedua-dua belah tangannya hingga siku dengan cara tapak tangan kiri menyapu tangan kanan dan tapak tangan kanan menyapu tangan kiri.

Ini berdasarkan hadith, daripada Ibn Umar R.Anhuma sabda Rasulullah SAW:

Maksudnya: “Cara bertayammum adalah dengan dua kali tepukan, sekali untuk muka dan sekali lagi untuk kedua-dua belah tangan hingga siku.”

(Riwayat al-Daraqutni)

Sapuan tersebut hendaklah meliputi seluruh anggota tayammum. Ini bererti sekiranya ada cincin di jari ia mestilah ditanggalkan ketika melakukan tepukan yang kedua supaya debu tanah boleh sampai ke bahagian jari tempat cincin tersebut.

iii. Tertib menurut cara yang telah disebutkan. Ini kerana tayammum menggantikan wudhu' yang tertib adalah antara rukunnya. Oleh itu lebih utama ia menjadi rukun kepada penggantinya.

Sunat Tayammum

1-Sunat dilakukan pada tayammum perkara-perkara yang sunat ketika berwudhu' iaitu membaca bismillah pada permulaannya. Mulakan sapuan pada bahagian atas muka. Mendahulukan sapuan tangan kanan daripada tangan kiri.

2-Merenggangkan jari-jari tangan ketika menepuk tanah sekali tepukan untuk menaikkan debunya dan menyapu seluruh muka. Cara yang demikian juga dilakukan pada kedua-dua belah tangan.

3-Menipiskan debu dengan mengirai kedua-dua belah tapak tangan sedikit atau meniupnya.

Bertayammum Setelah Masuk Waktu Solat

Untuk bertayammum bagi mendirikan solat fardhu mestilah setelah masuk waktu solat tersebut. Ini berdasarkan hadith, Rasulullah SAW bersabda:

Maksudnya: “Sesiapa daripada umatku mendapati waktu solat telah masuk hendaklah dia mengerjakannya.”

(Riwayat al-Bukhari)

Hadith seterusnya:

Maksudnya: “Di mana-mana aku mendapati waktu solat telah tiba, aku bertayammum dan menunaikan solat.”

(Riwayat Imam Ahmad)

Kedua-dua riwayat tersebut jelas menunjukkan tayammum itu dilakukan ketika hendak bersolat. Sementara solat pula tidak boleh dilakukan kecuali setelah tiba waktunya.

Bertayammum untuk Setiap Solat Fardhu

Orang yang bertayammum boleh melakukan satu solat fardhu sahaja, di samping beberapa solat sunat yang dikehendaki termasuk solat jenazah. Untuk mengerjakan solat fardhu yang lain sama ada solat Qadha’ atau wajib, dia hendaklah bertayammum semula sekalipun dia tidak berhadass selepas tayammum yang pertama.

Ini berdasarkan hadith, daripada Ibn Umar R.Anhuma, katanya:

Maksudnya: “Dia hendaklah bertayammum bagi setiap solat sekalipun dia tidak berhadass.”

(Riwayat al-Baihaqi)

Tayammum Sebagai Ganti Mandi Wajib

Tayammum bagi orang yang mempunyai sebab-sebabnya menjadi pengganti kepada mandi yang wajib ke atas dirinya sebagaimana ia menjadi pengganti kepada wudhu'. Firman Allah SWT:

Maksudnya: Dan jika kamu junub (berhadass besar) maka bersucilah dengan mandi wajib, dan jika kamu sakit (tidak boleh kena air), dalam pelayaran, salah seorang dari kamu datang dari tempat buang air, kamu sentuh perempuan, sedang kamu tidak mendapat air (untuk berwudhu' dan mandi), maka hendaklah kamu bertayammum

(Surah al-Maidah: 6)

Perkara yang Membatalkan Tayammum

Ada beberapa perkara, iaitu:

Pertama: Semua perkara yang membatalkan wudhu'

Kedua: Terdapat air yang sebelumnya tidak ada. Ini kerana tayammum menggantikan bersuci dengan air. Apabila ada yang asal batallah penggantian.

Ketiga: Berkemampuan menggunakan air. Contohnya orang yang telah sembuh daripada penyakit yang menghalangnya daripada menggunakan air.

Keempat: Murtad daripada Islam. Ini kerana tayammum hanya untuk mengharuskan ibadat dan ia terhapus dengan sebab murtad. Ini berlainan dengan wudhu' dan mandi kerana kedua-duanya untuk mengangkat hadas.

NOTA FEKAH -SOLAT 3

- Taarif dan Dalil
- Hukum Meninggalkan Solat
- Waktu Makruh Solat
- Syarat Wajib Solat
- Syarat Sah Solat
- Rukun Solat (13 Perkara)
- Sunat-Sunat Solat(Sebelum, Ketika Solat Dan Selepas Solat)
- Perkara Makruh Ketika Solat
- Perkara Yang Membatalkan Solat
- Solat Berjemaah
- Solat Qasar & Jamak
- Solat Jumaat

PENGERTIAN SOLAT

Perkataan solat dalam bahasa Arab bererti doa, iaitu memohon kebaikan. Firman Allah SWT:

Maksudnya: *Dan doakanlah untuk mereka, kerana sesungguhnya doamu itu menjadi ketenteraman bagi mereka.*
(Surah al-Taubah: 103)

Dalam istilah fuqaha' pula, perkataan solat bermaksud beberapa perkataan dan perbuatan yang tertentu, dan ia bermula dengan takbir dan disudahi dengan salam.

Ia dinamakan solat kerana ia mengandungi doa yang merupakan unsur yang banyak di dalamnya. Hal ini kerana menggunakan nama jujuk untuk maksud keseluruhannya

Hikmah Solat

Solat mempunyai beberapa hikmah dan rahsia yang dapat dirumuskan seperti berikut:

- i. Solat menyedarkan manusia akan hakikat dirinya yang sebenar sebagai hamba kepunyaan Allah SWT. Dia sentiasa menyedarinya setiap kali berhadapan dengan masalah hidup dan perhubungan dengan orang lain. Solat yang dilakukan akan mengingatkannya semula bahawa dia adalah hamba kepunyaan Allah SWT.
- ii. Solat memantapkan keyakinan manusia bahawa tidak ada pembantu dan pengurnia nikmat sebenar-benarnya selain Allah SWT meskipun kelihatan di dunia banyak pihak dan sebab yang pada zahirnya membantu dan memberi nikmat.
- iii. Dengan bersolat manusia dapat mengambil kesempatan menjadikannya sebagai waktu untuk bertaubat daripada dosa-dosa yang dilakukannya. Ini kerana manusia memang sentiasa terdedah kepada banyak maksiat pada setiap waktu sama ada disedarinya atau pun tidak.

- iv. Solat merupakan santapan bagi aqidah keimanan kepada Allah yang berterusan dalam hati manusia. Segala pesona dunia dan bisikan syaitan sememangnya menjadikan manusia lupa kepada aqidah walaupun telah lama terterap dalam hatinya. Solat yang dilakukan dengan tekun oleh seseorang muslim akan menjadi santapan iman dan tidak mampu dilemahkan atau dimusnahkan oleh segala pancaroba dunia.

Solat Fardhu

Dalil Pensyariatan Solat

Allah SWT telah memfardhukan beberapa solat atas setiap orang Islam yang *mukallaf*, iaitu Subuh, Zuhur, Asar, Maghrib dan Isya'.

Semua solat ini telah disyariatkan pada malam Rasulullah SAW Isra' ke Baitu al-Maqdis dan Mikraj ke langit. Allah SWT telah memfardhukan 50 solat sehari semalam ke atas Nabi Muhammad SAW dan seluruh umat Islam. Kemudian Allah SWT mengurangkannya kepada lima waktu dan mendapat pahala 50 solat.

Beberapa dalil al-Quran dan hadith Rasulullah SAW menunjukkan solat telah disyariatkan.

Dalil al-Quran

Firman Allah SWT:

Maksudnya: *Sesungguhnya sembahyang itu adalah satu ketetapan yang diwajibkan atas orang-orang yang beriman, yang tertentu waktunya.*

(Surah al-Nisa': 103)

Firman Allah SWT:

Maksudnya: *(Setelah kamu mengetahui yang demikian) maka bertasbihlah kepada Allah semasa kamu berada pada waktu malam dan semasa kamu berada pada waktu Subuh. Serta pujilah Allah yang berhak menerima segala puji (dari sekalian makhluk-Nya) di langit dan di bumi, dan juga (bertasbihlah kepada-Nya serta pujilah Dia) pada waktu petang dan semasa kamu berada pada waktu Zuhur.*²⁶

(Surah al-Rum: 17-18)

Dalil al-Sunnah

Hadith peristiwa Isra' yang terdahulu dan hadith Rasulullah SAW. Daripada Ibn Abbas R.Anhuma, Nabi mengutuskan Mu'az RA ke Yaman lalu Baginda bersabda:

ادْعُهُمْ إِلَى شَهَادَةِ أَنْ لَا إِلَهَ إِلَّا اللَّهُ، وَأَنِّي مُحَمَّدٌ رَسُولُ اللَّهِ، فَإِنْ هُمْ أَطَاعُوا لِذَلِكَ
فَأَعْلَمَهُمْ أَنَّ اللَّهَ قَدْ افْتَرَضَ عَلَيْهِمْ خَمْسَ صَلَوَاتٍ فِي كُلِّ يَوْمٍ وَلَيْلَةٍ

Maksudnya: “Serulah mereka bersaksi bahawa tiada Tuhan yang disembah dengan sebenar-benarnya selain Allah, dan aku Muhammad ialah utusan Allah. Jika mereka patuh beritahulah mereka bahawa Allah telah mewajibkan mereka lima kali solat sehari semalam.”

(Riwayat al-Bukhari dan Muslim)

Hukum Meninggalkan Solat

Orang yang meninggalkan solat sama ada kerana malas, cuai, ingkar dan sengaja meringan-ringankannya. Sesiapa yang meninggalkan solat kerana mengingkari hukum wajibnya atau sengaja mempersenda-sendakannya akan menjadi kafir dan terkeluar daripada agama Islam.

Pihak pemerintah wajib menyuruhnya bertaubat dan tidak membiarkannya

demikian sehingga dia bertaubat dan kembali mendirikan solat. Jika terus mengingkarinya dia akan dihukum bunuh sebagai seorang murtad dan mayatnya tidak harus dimandikan, dikapankan dan disembahyangkan. Malah tidak harus dikebumikan di tanah perkuburan orang Islam kerana dia bukan lagi di kalangan mereka.

Sementara orang yang meninggalkan solat kerana malas tetapi masih meyakini hukum wajibnya, pihak pemerintah hendaklah memaksanya mengqadha'kan solat, dan bertaubat daripada kesalahan meninggalkannya. Jika masih ingkar mengqadha'nya dia wajib dihukum bunuh mengikut hukuman yang disyariatkan atas orang Islam yang melakukan maksiat.

Ini kerana hukuman atas orang yang meninggalkan fardhu adalah wajib diperangi tetapi selepas dibunuh, dia masih dianggap seorang Islam. Justeru, jenazahnya, pengkebumiannya, dan pembahagian hartanya hendaklah diuruskan menurut tatacara Islam. Orang yang meninggalkan solat tidak dihukumkan kafir kerana jika dihukumkan demikian tentulah tidak termasuk dalam maksud sabda Nabi SAW, Allah akan memasukkannya ke dalam syurga mengikut kehendak-Nya.

Waktu Makruh Bersolat

Antara waktunya ialah:

- i. Ketika matahari rembang (الاستواء) kecuali pada hari Jumaat, dan selepas Subuh hingga matahari kelihatan setinggi sebatang tombak atau lembing.
- ii. Selepas solat Asar sehingga matahari terbenam.

Tegahan ini bagi solat yang tiada sebab mendahuluinya atau pengebumian jenazah yang sengaja dilakukan pada ketika itu. Ada pun pengebumian yang berlaku secara kebetulan dan bukan disengajakan pada waktu itu atau solat yang ada sebab mendahuluinya seperti solat sunat wudhu', solat menghormati (تحية) masjid dan solat qadha' tidaklah makruh melakukannya pada masa-masa tersebut. Tanah Haram Mekah dikecualikan secara mutlak daripada semua tegahan tersebut. justeru itu, harus bagi orang yang berada di Mekah untuk bersolat pada bila-bila masa.

Orang yang Wajib Bersolat

Solat diwajibkan atas setiap muslim lelaki dan perempuan yang waras, cukup umur dan suci. Solat tidak wajib kepada orang kafir tetapi mereka wajib menerima seksaan di akhirat kerana mereka boleh melakukannya dengan memeluk Islam.

Solat tidak wajib atas kanak-kanak kerana tidak *mukallaf*, orang gila kerana dia tidak siuman, dan perempuan yang kedatangan haidh atau *nifas* kerana solat mereka tidak sah disebabkan ada halangan hadas pada kedua-duanya.

Orang kafir yang masuk Islam tidak dituntut mengqadha' apa-apa kewajipan yang lepas sebagai tarikan kepada agama Islam.

Walau bagaimanapun orang yang murtad selepas kembali kepada Islam wajib mengqadha' semua kewajipan yang luput pada sepanjang masa murtadnya sebagai amaran keras kepadanya.

Sehubungan itu, perempuan yang kedatangan haidh atau *nifas* tidak wajib mengqadha' solat-solat yang tertinggal semasa haidh dan *nifas* supaya tidak menyusahkannya.

Begitu juga tidak diwajibkan qadha' atas orang gila atau pitam selepas mereka pulih daripada penyakit tersebut.

Ini berdasarkan hadith, Rasulullah SAW bersabda:

رُفِعَ الْقَلَمُ عَنْ ثَلَاثَةٍ عَنْ الصَّغِيرِ حَتَّى يَكْبُرَ وَالنَّائِمِ حَتَّى يَسْتَيْقِظَ وَعَنِ الْمَجْنُونِ حَتَّى يَعْقِلَ

Maksudnya: “Tidak dicatatkan dosa daripada tiga golongan: Kanak-kanak hingga dia baligh, orang yang tidur hingga dia jaga dan orang yang gila hingga dia siuman.”

Riwayat Abu Daud (4403)

Hadith ini menyatakan tentang orang gila sebagai golongan yang terlepas daripada tuntutan syara'. Oleh itu bolehlah diqiaskan pula kepada sesiapa yang hilang ingatan akibat daripada keuzurannya.

Walaupun orang yang tidur juga termasuk dalam kenyataan hadith di atas tetapi dia wajib qadha' berdasarkan hadith iaitu:

مَنْ نَامَ عَنْ صَلَاةٍ أَوْ نَسِيَهَا فَلْيُصَلِّهَا

Maksudnya: “Sesiapa yang tertidur hingga tertinggal solat atau terlupa bersolat hendaklah melakukannya apabila telah teringat.”

Riwayat Abu Daud

Walau bagaimanapun kanak-kanak yang berumur tujuh tahun wajib disuruh bersolat, dan dirotan jika meninggalkannya setelah berumur sepuluh tahun untuk membiasakannya melakukan solat.

SYARAT SAH SOLAT

Pengertian Syarat

Syarat bererti perkara yang wujud sesuatu itu bergantung kepadanya sedangkan perkara itu bukanlah sebahagian daripadanya. sebagai contohnya tumbuh-tumbuhan wujudnya di muka bumi ini bergantung kepada hujan sedangkan hujan bukanlah sebahagian daripada tumbuh-tumbuhan itu. Imam al-Syafie Rahimahullah merumuskan syarat-syarat sah solat kepada empat perkara berikut:

Pertama: Bersuci.

Ia terbahagi kepada beberapa bahagian dan semua bahagiannya mestilah suci supaya solat menjadi sah.

- i. Suci anggota badan daripada hadas. Solat orang yang berhadas tidak sah sama ada berhadas kecil seperti tiada wudhu' atau berhadas besar seperti janabah. Hal ini berdasarkan kepada hadith sahih, sabda Rasulullah SAW:

لَا تُقْبَلُ صَلَاةٌ بِغَيْرِ طَهْوَرٍ

Mak^a
sud bersuci.”

nya:

“Sol

at

tida

k

dite

rim

a

tanp

- ii. S
u
c
i
a
n

g
Riwayat
Muslim
t
a
b
a
d
a
n
d
a
r
i
p
a
d
a
n
a
j
i
s
.

- iii. Suci pakaian daripada najis. Tidak memadai badan sahaja yang suci daripada najis malah pakaian orang yang bersolat juga hendaklah suci daripadanya.
- iv. Suci tempat bersolat daripada najis. Tempat bersolat bermaksud ruang yang digunakan oleh orang yang bersolat termasuk tempat berpijak hingga ke tempat sujud yang bersentuhan dengan badannya ketika bersolat. Sehubungan itu, tidak mengapa tempat yang bernajis sekiranya tidak bersentuhan dengan badan. Contohnya ruang yang bertentangan dengan dada ketika ruku' dan sujud.

Kedua: Mengetahui Masuk Waktu.

Setiap solat fardhu mempunyai waktu-waktunya yang ditetapkan, dan solat mesti dilakukan dalam waktu-waktu itu. Walau bagaimanapun, bersolat dalam waktunya sahaja belum memadai malah orang yang bersolat mesti mengetahui waktunya sebelum melakukan solat tersebut. Oleh itu, tidak sah solat seseorang yang tidak mengetahui masuk waktunya walaupun ternyata kemudiannya solat yang dilakukannya sudah dalam waktunya.

Cara Mengetahui Masuk Waktu

Masuk waktu solat boleh diketahui melalui tiga cara berikut:

- i. Mengetahuinya dengan yakin, iaitu berpegang kepada dalil yang nyata seperti melihat matahari yang sedang *ghurub*.
- i. *Ijtihad*, iaitu berpegang kepada dalil yang kukuh yang mempunyai petunjuk tidak langsung seperti bayang-bayang atau dengan mengukur lama masa bekerja.
- ii. *Taqlid*. Sekiranya tidak mungkin mengetahui masuk waktu dengan yakin atau *ijtihad* seperti tidak tahu tentang waktu-waktu solat dan dalil-dalilnya, dia hendaklah *bertaqlid* sama ada kepada orang yang mengetahuinya melalui dalil-dalil yang nyata atau kepada seseorang mujtahid yang berpegang kepada dalil-dalil yang kukuh.

Hukum Bersolat di Luar Waktu

Apabila ternyata solat seseorang berlaku sebelum masuk waktu, solatnya dianggap batal dan wajib mengulanginya sama ada dia berpegang kepada keyakinannya, *ijtihadnya* atau *taqlid*.

Ketiga: Menutup Aurat.

Untuk mengetahui syarat ini, perlu diterangkan beberapa perkara yang berikut:

Pengertian Aurat: Aurat dari segi syara' bermaksud semua anggota yang wajib ditutup atau yang haram dilihat.

Batasan Aurat Ketika Bersolat

Aurat lelaki ialah bahagian badan antara pusat hingga lutut. Oleh itu wajib menutupnya dan tidak boleh kelihatan sedikitpun anggota tersebut ketika bersolat.

Sementara aurat perempuan pula ialah seluruh badan selain muka dan dua tapak tangan. Oleh itu wajib menutupnya dan tidak boleh kelihatan sedikitpun ketika bersolat selain anggota yang dikecualikan tersebut.

Batasan Aurat Ketika di Luar Solat

Aurat lelaki sesama lelaki walau apapun keadaannya dan aurat lelaki terhadap perempuan mahramnya ialah bahagian badan di antara pusat dan lutut. Sementara aurat lelaki terhadap perempuan lain pula mengikut pendapat yang muktamad adalah seluruh anggota badan selain muka dan dua tapak tangan. Oleh itu tidak harus bagi perempuan melihat anggota lelaki bukan mahramnya selain muka dan dua tapak tangan. Walau bagaimanapun, hukum melihat mukanya dengan berahi (*syahwat*) tetap haram.

Hal ini berdasarkan firman Allah SWT:

Maksudnya: “Dan katakanlah kepada perempuan-perempuan yang beriman supaya menyekat pandangan mereka (daripada memandang yang haram), dan memelihara kehormatan mereka.”

Batasan aurat perempuan Islam sesama mereka ialah bahagian badan di antara pusat dan lutut, manakala aurat perempuan Islam terhadap perempuan kafir ialah seluruh badan selain anggota yang biasa kelihatan kerana keperluan tugas seperti melakukan kerja-kerja di rumah dan sebagainya. Sementara itu aurat perempuan terhadap lelaki mahramnya ialah bahagian badan di antara pusat dan lutut. Ini bererti mereka harus mendedahkan seluruh anggota badannya yang lain di hadapan mahramnya dengan syarat terhindar daripada berlaku fitnah. Jika ada kemungkinan berlaku fitnah hukumnya tetap haram.

Aurat perempuan terhadap lelaki yang bukan mahram ialah seluruh tubuhnya. Oleh itu tidak harus dia mendedahkan mana-mana bahagian tubuhnya di hadapan mereka kecuali dengan sebab-sebab yang dimaafkan. Begitu juga sebaliknya, mereka tidak harus melihat mana-mana

bahagian tubuh badan perempuan bukan mahramnya yang terdedah.

Beberapa Keadaan yang Harus Mendedahkan Aurat dan Melihatnya dengan Sebab-sebab yang Dimaafkan.

- Ketika meminang perempuan untuk tujuan bernikah, harus melihat muka dan dua tapak tangan sebagaimana yang akan dijelaskan di dalam bab nikah.
- Untuk menjadi saksi atau untuk berurusan, harus melihat bahagian muka sahaja sekiranya perlu untuk mengenali perempuan tersebut yang tidak mungkin dikenali tanpa melihatnya.
- Untuk tujuan merawat dan berubat, harus mendedahkan aurat dan melihatnya setakat yang diperlukan.

Harus melihat aurat perempuan untuk tujuan merawat dan berubat dengan syarat dihadiri mahram atau suaminya bersama-sama, dan tiada orang perempuan yang mampu mengubatnya. Walau bagaimanapun sekiranya terdapat lelaki atau wanita Islam yang mampu melakukan rawatan tersebut, janganlah

menyerahkannya kepada orang yang bukan Islam.

Keempat: Menghadap Kiblat

Apa yang dimaksudkan dengan *kiblat* ialah Kaabah, manakala menghadap kiblat bermaksud Kaabah berhadapan dengannya.

Dalil Wajib Menghadap Kiblat

Dalil bagi syarat ini ialah firman Allah SWT:

Maksudnya: *Maka hadapkanlah mukamu ke arah Masjid al-Haram (Kaabah), dan di mana sahaja kamu berada maka hadapkanlah muka kamu ke arahnya.* (Surah al-Baqarah: 150)

Maksud *Masjid al-Haram* di dalam ayat dan maksud *kiblat* di dalam hadith tersebut ialah Kaabah.

Sejarah Pensyariatan Menghadap Kiblat

Sejarah pensyariatan menghadap kiblat bermula pada awal hijrah Nabi SAW ke Madinah. Hal ini berdasarkan hadith, daripada al-Bara' bin 'Azib RA berkata:

كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ نَحْوَ بَيْتِ الْمَقْدِسِ سِتَّةَ عَشَرَ، أَوْ سَبْعَةَ عَشَرَ شَهْرًا، وَكَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ يُحِبُّ أَنْ يُوجَّهَ نَحْوَ الْكَعْبَةِ فَأَنْزَلَ اللَّهُ تَعَالَى (قَدْ نَرَى تَقَلُّبَ وَجْهِكَ فِي السَّمَاءِ) فَوُجَّهَ نَحْوَ الْكَعْبَةِ

Maksudnya: Rasulullah SAW bersolat menghadap Baitul Maqdis selama 16 atau 17 bulan, dan Rasulullah SAW ingin dihadapkan ke Kaabah. Lalu Allah menurunkan ayat yang maksudnya: (Kerap kali Kami melihat engkau (wahai Muhammad), berulang-ulang menadah ke langit). Lalu Baginda pun menghadap Kaabah.

Riwayat al-Bukhari dan Muslim

Cara Penentuan Arah Kiblat

Orang yang bersolat sama ada berhampiran Kaabah yang dapat dilihatnya apabila dikehendaki atau jauh daripadanya yang tidak mungkin dilihat. Orang yang berhampiran dengan Kaabah wajib menghadap Kaabah tersebut dengan yakin manakala yang jauh dari Kaabah wajib menghadapnya dengan berpandukan petunjuk-petunjuk yang kukuh sekiranya tidak terdapat petunjuk yang pasti dan tepat.

Cara Bersolat dan Bilangan Rakaatnya

Ketika Allah mewajibkan solat fardhu atas orang Islam, Jibril menemui Nabi SAW sebagaimana yang diterangkan dahulu untuk menjelaskan waktu permulaan setiap solat, waktu berakhirnya dan bilangan rakaatnya kepada Baginda seperti berikut:

Solat Fajar

Solat *Fajar*, iaitu solat Subuh sebanyak dua rakaat dengan dua kali berdiri dan sekali *tasyahhud* akhir.

Solat Zuhur

Bersolat sebanyak empat rakaat dengan dua *tasyahhud*. *Tasyahhud* yang pertama dalam dua rakaat yang pertama dan *tasyahhud* yang kedua pada akhir solat.

Solat Asar

Solat Asar ialah empat rakaat dan pelaksanaannya sama dengan solat Zuhur.

Solat Maghrib

Solat Maghrib ialah tiga rakaat dengan dua *tasyahhud*. *Tasyahhud* yang pertama dalam dua rakaat yang pertama dan *tasyahhud* yang kedua pada akhir solat.

Solat Isya'

Bilangan rakaat dan pelaksanaan solat Isya' juga sama dengan solat Zuhur dan solat Asar.

PENGERTIAN RUKUN

Rukun adalah bahagian yang asas bagi sesuatu perkara. Contohnya dinding bagi sesebuah bilik. Oleh itu bahagian-bahagian solat adalah rukun-rukunnya seperti ruku', sujud dan seumpamanya. Solat tidak akan sempurna dan tidak sah kecuali dengan menyempurnakan kesemua bahagiannya mengikut cara dan susun atur yang datang daripada Rasulullah SAW sebagaimana yang diterimanya daripada Jibril AS. Semua rukun solat dirumuskan kepada 13 perkara dan akan diuraikan satu persatu-satu sebagaimana berikut:

Pertama: Niat

Niat ialah mengingati tujuan sesuatu perbuatan ketika mula melakukannya. Tempat niat ialah di dalam hati. Hal ini berdasarkan hadith, sabda Nabi SAW:

إِنَّمَا الْأَعْمَالُ بِالنِّيَّاتِ

Maksudnya: “*Sesungguhnya amalan itu adalah dengan niat.*”

(Riwayat al-Bukhari dan Muslim)

Untuk menjadikan solat sah, seseorang hendaklah menyertakan niat di dalam hati ketika bertakbiratul Ihram dan sedar akan tujuannya untuk bersolat semasa melafazkan takbir tersebut serta mengingati jenis solat dan fardhunya. Sementara niat untuk bersolat pula tidak disyaratkan melafazkannya.

Kedua: Berdiri Sekiranya Mampu Ketika Solat Fardhu

Wajib berdiri bagi mereka yang mampu melakukannya. Hal ini berdasarkan hadith, daripada Imran bin Husain RA katanya, aku menghidap penyakit buasir lalu aku bertanya kepada Rasulullah SAW tentang solat. Baginda bersabda:

Maksudnya: “*Bersolatlah secara berdiri, jika tidak mampu lakukanlah secara duduk dan jika tidak mampu juga lakukanlah secara mengiring.*”

Riwayat al-Bukhari

Seseorang itu dianggap berdiri apabila dia berdiri tegak. Sekiranya dia

membongkok tanpa sebab yang dimaafkan hingga tapak tangannya menyentuh lutut, solatnya batal disebabkan tiada rukun berdiri pada satu bahagian solat tersebut.

Orang yang mampu berdiri pada sebahagian solatnya dan tidak berdaya pada sebahagian yang lain, hendaklah berdiri setakat yang termampu dan bolehlah duduk pada semua bahagian yang lainnya. Berdiri bagi yang mampu hanya wajib pada solat fardhu, manakala solat sunat boleh dilakukan secara duduk sama ada seseorang itu mampu berdiri atau pun tidak kerana hukum berdiri pada semua solat tersebut hanya sunat.

Ketiga: *Takbiratul Ihram*

Dalil bagi rukun yang ketiga ini ialah berdasarkan hadith, Nabi SAW bersabda:

Maksudnya: “*Kunci solat ialah suci, ihramnya ialah takbir dan tahallulnya ialah salam.*”

(Riwayat al-Tirmizi)

Cara *Takbiratul Ihram*

Takbir mestilah dengan lafaz (اللهُ أَكْبَرُ) dan tidak mengapa ditambah dengan sifat-sifat Allah yang lain seperti (اللهُ الْأَكْبَرُ) atau (اللهُ الْجَلِيلُ أَكْبَرُ) tetapi takbir tidak sah sekiranya ditambah perkataan yang lain selain daripada sifat-sifat Allah SWT seperti (اللهُ هُوَ الْأَكْبَرُ) atau mengubah sebutan seperti (أَكْبَرُ اللهُ).

Hal ini berdasarkan perbuatan Nabi SAW yang perlu diikuti. Baginda sentiasa melakukan *takbiratul ihram* dengan lafaz tersebut.

Syarat *Takbiratul Ihram*

Syarat-syarat sah *takbiratul ihram* adalah seperti berikut:

- Melafazkan *takbiratul ihram* setelah berdiri. Oleh itu takbir tidak sah semasa bangun untuk bersolat dimana badannya belum betul-betul tegak.
- Hendaklah bertakbir dalam keadaan menghadap kiblat.

- Bertakbir dalam bahasa Arab. Orang yang tidak mampu bertakbir dalam bahasa Arab dan tidak mungkin mempelajarinya pada waktu itu bolehlah menterjemahkan maksudnya dalam apa-apa bahasa yang dikehendakinya. Tetapi dia wajib mempelajarinya jika berkemampuan.
- Mendengar semua huruf *takbiratul ihram* yang diucapkannya sendiri jika pendengarannya baik.

Keempat: Membaca *Fatihah*

Membaca *fatihah* merupakan rukun pada setiap rakaat solat walau apa pun jenis solat tersebut. Hal ini berdasarkan hadith, Nabi SAW bersabda:

لَا صَلَاةَ لِمَنْ لَمْ يَقْرَأْ بِفَاتِحَةِ الْكِتَابِ

Maksudnya: “Tidak sah solat orang yang tidak membaca *fatihah*.”

(Riwayat al-Bukhari dan Muslim)

Basmalah ialah satu ayat daripada ayat *Fatihah*. Oleh itu tidak sah *fatihah* yang tidak dimulai dengannya.

Syarat Sah *Fatihah*

Semasa membaca *fatihah* hendaklah memberi perhatian kepada syarat-syarat yang berikut:

- i. Mendengar bacaannya sendiri jika pendengarannya baik.
- ii. Membaca urutan ayatnya yang sebenar dan memberi perhatian kepada makhraj huruf serta kejelasan *syaddahnya*.
- iii. Tidak melakukan kesalahan bacaan yang membawa perubahan makna. Namun *fatihah* tidak batal jika membacanya dengan kesalahan sebutan yang tidak memberi kesan kepada ketepatan maknanya.
- iv. Membaca *fatihah* dalam bahasa Arab. Tidak sah membaca

terjemahannya kerana ia bukan al-Quran.

- v. Membaca *fatihah* ketika berdiri. Jika ruku' sambil menghabiskan bacaan *fatihah*nya, bacaan tersebut batal dan wajib mengulangnya.

Walau bagaimanapun sekiranya tidak mampu menguasai *fatihah* disebabkan dia bukan bangsa Arab dan sebagainya, dia hendaklah menggantikannya dengan membaca tujuh ayat al-Quran yang dihafaznya, dan jika tidak mampu juga dia hendaklah berzikir kepada Allah SWT sekadar masa bacaan *fatihah* sebelum dia ruku'.

Kelima: Ruku'

Sekurang-kurangnya ruku' pada syara' ialah membongkok sekadar yang boleh dua tapak tangannya sampai kepada dua lututnya, manakala ruku' yang lebih sempurna ialah membongkok sehingga belakangnya sama rata secara mendatar.

Dalil Ruku'

Firman Allah SWT:

Maksudnya: *Wahai orang-orang yang beriman, ruku'lah serta sujudlah (mengerjakan sembahyang).*

(Surah al-Haj: 77)

Dan hadith, sabda Rasulullah SAW kepada orang yang diajarnya bersolat:

ثُمَّ ارْكَعْ حَتَّى تَطْمَئِنَّ رَاكِعًا

Maksudnya: “Kemudian ruku'lah hingga engkau tetap dalam keadaan itu.”

Riwayat al-Bukhari dan Muslim

Begitu juga daripada dalil perbuatan Rasulullah SAW yang *thabit* dalam beberapa hadith sahih yang lain.

Syarat Ruku'

Adalah seperti berikut:

- i. Membongkokkan badan sekira-kira tapak tangan sampai pada lutut sebagaimana yang telah dinyatakan dahulu.
- ii. Tidak membongkokkan badan dengan tujuan yang lain selain daripada ruku'. Justeru, ruku' tidak sah sekiranya membongkok kerana takut daripada sesuatu kemudian membongkok dengan tujuan menjadikannya ruku'.
- iii. Tetap seketika (الطَّمَّانِيَّةُ) sekurang-kurangnya membongkok dengan tetap sekadar masa sekali tasbih.

Cara ruku' yang lebih sempurna ialah menyamakan belakang dengan tengkuk dalam keadaan rata, lurus dan tidak melengkung. Sementara dua betis ditegakkan dan kedua-dua belah tangan dengan jari terbuka memegang dua lutut sambil membaca tasbih sebanyak tiga kali.

Keenam: *I'tidal* (berdiri tegak selepas ruku')

I'tidal ialah berdiri di antara ruku' dan sujud. Hal ini berdasarkan hadith, daripada Aisyah R.Anha ketika menceritakan cara bersolat Rasulullah SAW, katanya:

كَانَ إِذَا رَفَعَ رَأْسَهُ مِنَ الرُّكُوعِ لَمْ يَسْجُدْ حَتَّى يَسْتَوِيَ قَائِمًا

Maksudnya: “Apabila mengangkat kepalanya daripada ruku', Baginda tidak sujud sehingga telah berdiri tegak.”

Riwayat Muslim (498)

Syarat *I'tidal*

Syarat-syarat sah *i'tidal* adalah seperti berikut:

- Tidak bertujuan lain selain daripada ibadat.
- Tetap seketika sekadar masa sekali tasbih.
- Tidak berdiri terlalu lama hingga melebihi kadar bacaan *fatihah*. Ini

kerana *i'tidal* merupakan rukun yang pendek dan tidak harus dipanjangkan.

Ketujuh: Sujud Sebanyak Dua Kali pada Setiap Rakaat

Pengertian sujud pada syara' ialah dahi orang yang bersolat bersentuhan secara langsung dengan dengan tempat sujudnya.

Dalil sujud berdasarkan firman Allah SWT (Surah al-Hajj: 77) sepertimana yang telah diterangkan sebelum ini dalam rukun ruku'.

Begitu juga hadith, Rasulullah SAW ketika mengajarkan cara-cara bersolat kepada orang yang tidak betul melakukannya:

ثُمَّ اسْجُدْ حَتَّى تَطْمَئِنَّ سَاجِدًا، ثُمَّ ارْفَعْ حَتَّى تَطْمَئِنَّ جَالِسًا، ثُمَّ اسْجُدْ حَتَّى تَطْمَئِنَّ
سَاجِدًا

Maksudnya: “Kemudian sujudlah sehingga tetap dalam keadaan itu, kemudian bangunlah sehingga tetap keadaan dudukmu, kemudian sujudlah lagi sehingga keadaannya tetap.”

Syarat Sujud

Untuk menjadikan sujud itu sah, ia perlu diberi perhatian kepada perkara- perkara berikut:

Pertama: Menyentuh tempat sujud dengan dahi yang terdedah.

Kedua: Melakukan sujud dengan tujuh anggota badan. Hal ini berdasarkan hadith, sabda Nabi SAW:

أُمِرْتُ أَنْ أَسْجُدَ عَلَى سَبْعَةِ أَعْظُمٍ عَلَى الْجَبْهَةِ وَأَشَارَ بِيَدِهِ عَلَى أَنْفِهِ وَالْيَدَيْنِ، وَالرُّكْبَتَيْنِ
وَأَطْرَافِ الْقَدَمَيْنِ

Maksudnya: “*Aku diperintahkan sujud dengan tujuh tulang anggota, dengan dahi (sambil Baginda menunjukkan tangannya ke bahagian atas hidung), dengan dua tangan, dua lutut dan hujung kedua-dua belah kaki.*”

Riwayat al-Bukhari dan Muslim

Bagaimanapun tidak wajib mendedahkan semua anggota tersebut kecuali dahi.

Ketiga: Bahagian anggota punggung hendaklah terangkat lebih tinggi seberapa yang boleh daripada kepala. Hal ini sebagai mengikut perbuatan Rasulullah SAW.

Keempat: Tidak sujud di atas pakaian yang dipakai yang bergerak mengikut pergerakannya.

Kelima: Tidak bertujuan yang lain selain daripada sujud. Contohnya kerana takut dan sebagainya.

Keenam: Menekankan dahi di tempat sujud sehingga sekiranya kapas atau seumpamanya yang diletakkan di bawah dahi tertindih dan meninggalkan kesan sujud yang jelas di atasnya.

Ketujuh: Tetap seketika semasa sujud sekurang-kurangnya sekadar sekali tasbeih. Cara sujud yang lebih sempurna ialah dengan bertakbir ketika turun sujud, meletakkan dua lutut diikuti dua tangan kemudian dahi dan hidung. Dua tangan terletak bertentangan dua bahu dengan jari-jari dilepaskan rapat ke arah kiblat. Jarakkan perut daripada dua peha, dan dua siku daripada lantai dan dua rusuk sambil bertasbeih sebanyak tiga kali.

Walau bagaimanapun cara sujud perempuan berbeza daripada cara sujud lelaki. Ketika perempuan sujud hendaklah merapatkan anggota- anggotanya antara satu sama lain.

Kelapan: Duduk di antara Dua Sujud

Perkara ini diwajibkan pada setiap rakaat berdasarkan hadith yang lalu, sabda Rasulullah SAW:

ثُمَّ ارْفَعْ حَتَّى تَطْمَئِنَّ جَالِسًا

Maksudnya: “*Kemudian bangunlah hingga tetap keadaan dudukmu.*”

Syarat Duduk di Antara Dua Sujud

- i. Tujuan duduk semata-mata kerana ibadat tanpa sebab-sebab sampingan yang lain seperti takut dan sebagainya.
- ii. Tidak terlalu lama hingga melebihi kadar masa sekurang-kurangnya bacaan tasyahhud.
- iii. Duduk tetap seketika sekurang-kurangnya sekali tasbih.

Kesembilan: Duduk yang Akhir

Duduk pada rakaat penghabisan yang diikuti dengan salam. Kesepuluh:

Membaca *Tasyahhud* Ketika Duduk yang Penghabisan

Terdapat beberapa riwayat yang sahih tentang lafaz *tasyahhud* sepenuhnya yang *afdhal* pada Imam al-Syafie Rahimahullah adalah berdasarkan hadith, Ibn Abbas R.Anhuma berkata:

كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ يُعَلِّمُنَا التَّشَهُّدَ كَمَا يُعَلِّمُنَا السُّورَةَ مِنَ الْقُرْآنِ
فَكَانَ يَقُولُ: التَّحِيَّاتُ الْمُبَارَكَاتُ الصَّلَوَاتُ الطَّيِّبَاتُ لِلَّهِ، السَّلَامُ عَلَيْكَ أَيُّهَا النَّبِيُّ
وَرَحْمَةُ اللَّهِ وَبَرَكَاتُهُ، السَّلَامُ عَلَيْنَا وَعَلَى عِبَادِ اللَّهِ الصَّالِحِينَ، أَشْهَدُ أَنْ لَا إِلَهَ إِلَّا اللَّهُ،
وَأَشْهَدُ أَنَّ مُحَمَّدًا رَسُولُ اللَّهِ

Maksudnya: “Rasulullah SAW mengajar kami lafaz tasyahhud sebagaimana Baginda mengajar kami surah daripada al-Quran. Baginda bersabda yang bermaksud: Segala penghormatan yang suci, segala pujian yang baik hanya bagi Allah SWT, selamat sejahtera ke atasmu wahai Nabi, begitu juga rahmat Allah SWT dan keberkatan-Nya. Selamat sejahtera ke atas kamu kami dan semua hamba Allah yang soleh. Aku menjadi saksi bahawa tiada Tuhan yang sebenar-benarnya selain Allah dan aku menjadi saksi bahawa Nabi Muhammad pesuruh Allah.”

Perkara yang Perlu Diberi Perhatian Ketika Membaca *Tasyahhud*

- i. Mendengar bacaannya sendiri jika pendengarannya baik.
- ii. Membaca semua lafaz *tasyahhud* secara berturutan. Jika lafaznya terpisah dengan diam yang lama atau zikir yang lain, maka *tasyahhudnya* batal, dan wajib mengulangnya.
- iii. Membaca *tasyahhud* ketika duduk kecuali apabila keuzuran, maka bolehlah membacanya dengan apa-apa cara yang termampu.
- iv. Membaca *tasyahhud* dalam bahasa Arab. Jika tidak mampu bolehlah membaca terjemahannya dalam bahasa apa-apa pun yang dikehendaki. Walau bagaimanapun, dia tetap wajib mempelajarinya.
- v. Memberi perhatian kepada *makhraj* huruf dan *syaddah*. Jika mengubah *makhraj* satu huruf atau mencuaikan satu *syaddah* atau sikap menyebut satu perkataan yang menyebabkan maknanya berubah maka *tasyahhudnya* batal dan wajib mengulangnya.
- vi. Mengikut urutan ayatnya sebagaimana teks yang telah dinyatakan.

Kesebelas: Berselawat ke atas Nabi SAW Selepas *Tasyahhudd* Akhir

Hendaklah berselawat ke atas Nabi SAW sebelum memberi salam apabila selesai membaca *tasyahhud* akhir.

Hal ini berdasarkan firman Allah SWT:

Maksudnya: *Sesungguhnya Allah dan malaikat-Nya berselawat (memberi segala penghormatan dan kebaikan) kepada Nabi (Muhammad SAW), wahai orang-orang yang beriman berselawatlah kamu kepadanya serta ucapkanlah salam sejahtera dengan penghormatan yang sepenuhnya.*

(Surah al-Ahzab: 56)

Para ulama' telah sepakat menyatakan bahawa berselawat tidak wajib di luar solat. Oleh itu, ternyata perintah berselawat di dalam ayat di atas wajib

dilakukan ketika bersolat.

Syarat Berselawat ke Atas Nabi

Antara syarat yang perlu seperti berikut:

- i. Mendengar bacaannya sendiri jika pendengarannya baik. Berselawat sama ada dengan lafaz *Muhammad*, *Rasul* atau *Nabi* tetapi tidak memadai jika disebut dengan lafaz *Ahmad*.
- ii. Berselawat dalam bahasa Arab. Jika tidak menguasainya bolehlah diterjemahkan maksudnya ke dalam bahasa yang dikehendakinya. Walau bagaimanapun dia wajib segera mempelajarinya jika ada kemungkinan berbuat demikian.
- iii. Berselawat mengikut urutan lafaznya. Begitu juga urutan antara selawat dengan *tasyahhud*. Justeru, tidak sah mendahulukan selawat daripada *tasyahhud*.

Kedua Belas: Salam yang Pertama

Orang yang bersolat hendaklah mengucapkan (السلام عليكم ورحمة الله) sambil berpaling ke kanannya. Hal ini berdasarkan hadith yang lalu tentang *takbiratul Ihram*. Sabda Rasulullah SAW:

تَحْرِيمُهَا التَّكْبِيرُ وَتَحْلِيلُهَا التَّسْلِيمُ

Maksudnya: “*Ihramnya takbir dan yang menghalalkannya salam.*” Sekurang-

kurangnya lafaz salam (السلام عليكم) sekali, dan yang sebaik-

baiknya ialah (السلام عليكم ورحمة الله) sebanyak dua kali, iaitu pada kali pertama sambil berpaling ke kanan dan pada kali kedua pula berpaling ke kiri. Hal ini berdasarkan hadith, daripada Sa'd RA:

كُنْتُ أَرَى رَسُولَ اللَّهِ صَلَّى اللَّهُ عَلَيْهِ وَسَلَّمَ يُسَلِّمُ عَنْ يَمِينِهِ وَعَنْ يَسَارِهِ حَتَّى أَرَى بَيَاضَ خَدِّهِ

Maksudnya: “*Aku melihat Rasulullah SAW mengucapkan salam ke kanan dan ke kirinya hingga kelihatan putih pipinya.*”

Riwayat Muslim (582)

Ketiga Belas: Melakukan Semua Rukun Mengikut Urutan (ترتيب)

Rukun Sebagaimana Asalnya

Tertib solat bermula dengan niat dan *takbiratul Ihram* kemudian membaca *fatihah* kemudian ruku', *i'tidal*, sujud dan seterusnya. Oleh itu solat seseorang akan batal jika sengaja mendahulukan sesetengah rukun tersebut daripada tempatnya sebagaimana yang disyariatkan. Sebaliknya jika berlaku tanpa disengajakan solatnya terbatal bermula daripada awal rukun yang tersilap tersebut, dan wajib mengulanginya.

Pengertian Sunat

Sunat ialah perbuatan yang dituntut melakukannya tanpa kemestian. Walau bagaimanapun yang melakukannya diberi pahala dan yang meninggalkannya pula tidak berdosa. Terdapat banyak perkara sunat dan ia dibahagikan kepada tiga kumpulan, iaitu sunat-sunat yang dilakukan sebelum bersolat, semasa bersolat dan selepas bersolat.

Sunat Sebelum Bersolat

Sunat-sunat sebelum bersolat tidak melebihi tiga perkara berikut:

Pertama: Azan

Kedua: Iqamah

Ketiga: Menjadikan Sesuatu Sebagai Sekatan (مُسْتَرَدَّةٌ) di hadapannya

Sekatan adalah sebagai tanda pemisah di antara orang yang bersolat dengan orang yang lalu-lalang di hadapannya, seperti dinding, tiang, tongkat atau menghamparkan sejadah dan sebagainya. Jika tidak didapati apa-apa pun buatlah

tanda garisan sahaja.

Sementara cara yang *afdhal* pula ialah meletakkan sekatan berhampiran dengan tempat sujud.

Sunat Semasa Bersolat

Sunat-sunat semasa menunaikan solat terbahagi kepada dua bahagian iaitu sunat *Ab'adh* (أَبْعَاضُ) dan sunat *Hai'ah* (هَيْئَاتُ).

Sunat *Ab'adh* jika tertinggal perlu diganti dengan *sujud sahwi* pada akhir solat.

Sementara sunat *Hai'ah* pula jika ditinggalkan tidak perlu diganti dengan *sujud sahwi*. Hal ini akan dihuraikan kemudian dalam perbincangan tentang amalan-amalan solat.

Sunat *Ab'adh*

- i. *Tasyahhud* Awal: *Tasyahhud* awal bermaksud *tasyahhud* ketika duduk yang tidak diikuti dengan salam. Oleh itu sunat membaca *tasyahhud* ketika duduk dalam rakaat yang kedua bagi solat-solat Zohor, Asar, Maghrib dan Isya'.
- ii. Berselawat ke atas Nabi Selepas *Tasyahhud* Awal
- iii. Duduk bagi *Tasyahhud* Awal
- iv. Berselawat ke atas Keluarga Nabi SAW Selepas *Tasyahhud* Akhir
- v. Membaca Qunut

Membaca qunut adalah semasa *i'tidal* dalam rakaat yang kedua ketika solat Subuh dan dalam rakaat yang kedua dalam solat Witir pada separuh yang kedua di dalam bulan Ramadhan. Sunat mengangkat kedua-dua belah tangan ketika membaca qunut dengan menadah kedua-dua tapak tangan.

Sunat *Hai'ah*

Sebagaimana yang telah disebutkan, sunat *hai'ah* ialah sunat-sunat solat yang sekiranya ditinggalkan tidak sunat digantikan dengan *sujud sahwi*.

Pertama: Mengangkat kedua-dua belah tangan ketika *takbiratu al-ihram*, ketika ruku', dan ketika bangun dari ruku'.

Cara melakukannya adalah dengan mengangkat kedua-dua belah tangan sementara jari-jari dan tapak tangan terbuka dan kedua-dua ibu jari bertepatan dengan kedua-dua cuping telinga.

Kedua: Meletakkan telapak tangan kanan di atas belakang tangan kiri ketika berdiri.

Ketiga: Memandang ke tempat sujud

Keempat: Bacaan doa *iftitah*.

Kelima: Membaca *Isti'azah* selepas doa *iftitah*

Keenam: Menyaringkan bacaan dan memperlahkannya pada tempat-tempatnya

Kelapan: Membaca al-Quran setelah bacaan *fatihah*

Kesepuluh: Bertasbih ketika ruku' dan sujud.

Caranya adalah dengan berkata (سُبْحَانَ رَبِّيَ الْعَظِيمِ وَبِحَمْدِهِ) sebanyak tiga kali setelah ruku' dengan sempurna dan berkata (سُبْحَانَ رَبِّيَ الْأَعْلَى وَبِحَمْدِهِ) sebanyak tiga kali setelah sujud dengan sempurna.

Kesebelas: Meletakkan kedua-dua belah tangan di atas dua peha pada kedua-dua duduk *tasyahhud*.

Ketiga belas: Membaca selawat *Ibrahimiyyah* dan berdoa selepas *tasyahhud* akhir.

Keempat belas: Mengucap salam yang kedua.

Kelima belas: Sentiasa khusyu' pada sepanjang solat.

Pengertian khusyu' ialah kesadaran hati terhadap semua bacaan, zikir dan doa yang dituturkan oleh lidah sambil memerhati serta memikirkannya, menghayati maknanya dan berasa sedang bermunajat kepada Allah SWT.

Sunat Selepas Solat

Selepas bersolat sunat melakukan perkara-perkara yang berikut:

Pertama: Memohon keampunan (إِسْتِغْفَار) berzikir dan berdoa.

Kedua: Beralih tempat bersolat fardhu untuk melakukan solat sunat supaya banyak tempat sujud yang akan menjadi saksi.

Ketiga: Mendahulukan jemaah perempuan bersurai selepas solat. Selepas bersolat, sunat bagi jemaah lelaki terus berada di tempat masing-masing hingga semua jemaah perempuan bersurai. Ini kerana bercampur gaul dengan mereka merupakan punca kerosakan.

MAKRUH DALAM SOLAT

Makruh dalam solat ialah perkara yang diberi pahala kepada orang yang bersolat kerana patuh meninggalkannya, dan tidak pula berdosa melakukannya. Meninggalkan takbir ketika perpindahan antara rukun dan meninggalkan doa *iftitah* ketika bersolat adalah makruh kerana melakukan kedua-duanya adalah sunat. Walau bagaimanapun, terdapat beberapa perlakuan tertentu yang lain sunat dijauihi dan makruh dilakukan oleh orang yang bersolat, antaranya ialah:

Pertama: Menolehkan Kepala Ketika Bersolat Kecuali dengan Sebab yang Diperlukan

Kedua: Memandang ke atas

Ketiga: Mengusap Rambut dan Melipat-melipat Hujung Pakaian Ketika Bersolat

Keempat: Bersolat Berhampiran Hidangan yang Menyelerakan

Kelima: Bersolat sambil Menahan Buang Air Kecil atau Besar
Keenam: Bersolat Ketika Sangat Mengantuk

Ketujuh: Solat di tempat-tempat berikut

PERKARA YANG MEMBATALKAN SOLAT

Solat seseorang akan batal apabila melakukan satu daripada perkara yang berikut:

- i. Berkata-kata dengan Sengaja

Kata-kata yang dimaksudkan ialah kata-kata yang lain selain daripada al-Quran, zikir dan doa.

Hadith daripada Mu`awiyah bin Hakam al-Sulami RA, Nabi SAW berdoa kepadanya yang mendoakan seseorang yang bersin ketika bersolat:

إِنَّ هَذِهِ الصَّلَاةَ لَا يَصْلُحُ فِيهَا شَيْءٌ مِنْ كَلَامِ النَّاسِ إِنَّمَا هُوَ التَّسْبِيحُ وَالتَّكْبِيرُ
وَقِرَاءَةُ الْقُرْآنِ

Maksudnya: “Ini ialah ibadat solat, kata-kata manusia tidak wajar di dalamnya walaupun sedikit. Ia adalah semata-mata untuk bertasbih, bertakbir dan membaca al-Quran.”

Riwayat Muslim (537)

Kata-kata yang dianggap membatalkan solat ialah kata-kata yang mengandungi dua huruf dan lebih walaupun tidak memberi apa-apa pengertian. Begitu juga satu huruf tetapi ia mempunyai makna seperti *qi*

(ق) yang bererti *peliharalah*, *`ie* (ع) yang bererti *sedarlah*, dan *fi* (ف) yang bererti *tunaikanlah*. Walau bagaimanapun jika berkata-kata ketika bersolat kerana terlupa atau tidak mengetahui tentang haramnya disebabkan baru memeluk Islam, kedua-duanya dimaafkan sekiranya kata-kata tersebut sedikit, tidak melebihi enam perkataan.

ii. Melakukan Perbuatan yang Banyak

Perbuatan yang dimaksudkan ialah pergerakan yang banyak dan berturut-turut selain daripada perbuatan solat. Ini kerana ia bertentangan dengan peraturan solat. Ukuran perbuatan yang banyak yang membatalkan solat ialah tiga kali pergerakan dan lebih manakala penentuan berturut-turut pula ialah perbuatan yang berturutan pada anggapan umum.

iii. Terkena Najis pada Pakaian atau Badan

Terkena najis bermaksud apabila najis mengenai mana-mana bahagian pakaian atau badan orang yang bersolat. Solatnya batal sekiranya najis tersebut tidak dibuangkan dengan segera. Ini kerana telah berlaku perkara-perkara yang bertentangan dengan satu daripada syarat solat, iaitu suci badan dan pakaian daripada najis. Walau bagaimanapun jika terkena najis yang ditiup angin atau sebagainya dan dapat pula dibuangkan dengan segera kerana najis itu kering, solat tersebut tidaklah batal.

iv. Terbuka Aurat Walaupun Sedikit

Kita telah pun mengetahui sempadan aurat lelaki dan perempuan ketika bersolat. Oleh itu, seseorang yang sengaja membuka auratnya ketika bersolat walaupun sedikit, batallah solatnya tanpa kecuali. Tetapi jika auratnya terbuka tanpa disengajakan, solatnya tidak batal sekiranya ditutup dengan segera. Namun jika lambat ditutup solatnya tetap batal.

v. Makan atau Minum

Makan dan minum adalah bertentangan dengan tingkah laku dan peraturan solat.

Justeru, seseorang yang sengaja melakukannya ketika bersolat batallah solatnya walaupun sedikit. Namun jika tidak disengajakan solatnya juga batal jika kadar yang dimakan atau minum itu banyak pada anggapan umum. Ulama' fiqh menganggarkan kadar *banyak* tersebut ialah apabila kadar keseluruhan yang tertelan menyamai sebiji kacang putih. Walau bagaimanapun solat tidak batal jika tertelan air liur yang bercampur dengan sisa-sisa makanan yang terselit di celah-celah gigi sekiranya tidak sampai kadar tersebut.

vi. Berhadas Sebelum Salam yang Pertama

Solat akan batal sama ada berhadas dengan sengaja atau pun terlupa kerana ketiadaan satu daripada syarat solat, iaitu suci daripada hadas sebelum sempurna semua rukunnya. Sebaliknya jika berhadas sekepas salam yang pertama dan sebelum salam yang kedua, solat itu dikira telah berakhir dengan sah. Inilah hukum yang disepakati oleh semua orang Islam.

vii. Berdehem, Tertawa, Menangis dan Mengerang jika Terkeluar dengan Jelas Bunyi Dua Huruf daripada Setiap Perbuatan Tersebut

Ukuran yang membatalkan solat bagi empat perkara tersebut adalah apabila berlaku dengan sengaja hingga ternyata bunyi dua huruf walaupun tidak difahami. Tetapi solat tidak batal sekiranya perkara itu sedikit sahaja dan hanya terdengar satu huruf atau tiada apa-apa huruf yang terkeluar.

Begitu juga solat tidak batal apabila ia berlaku secara terdesak seperti terbatuk secara tiba-tiba atau tidak dapat menahan ketawa. Dalam hal ini, tersenyum tidak membatalkan solat. Sebaliknya zikir dan doa akan membatalkan solat apabila ditujukan kepada seseorang seperti

menyebut (يَرْحَمُكَ اللَّهُ) yang bermaksud: “*Semoga Allah merahmatimu*”

kerana ia dianggap percakapan sesama manusia yang tidak wajar dicampurkan dalam solat.

viii. Berubah Niat

Berubah niat, iaitu membuat keputusan keluar daripada solat atau akan berhenti solat kerana sesuatu sebab seperti kedatangan seseorang atau seumpamanya. Oleh itu, solatnya terus batal sebaik sahaja ada niat tersebut. Hal ini kerana solat tidak sah melainkan dengan niat yang tetap, dan ia bertentangan dengan perubahan

tersebut.

ix. Membelakangi Kiblat

Menghadap kiblat adalah salah satu syarat asas daripada syarat-syarat solat. Perbuatan membelakanginya akan membatalkan solat sama ada disengajakan atau dia dipusing oleh orang lain secara paksa.

Dalam keadaan sengaja, solat akan batal serta merta. Manakala dalam keadaan dipaksa pula, solat tidak batal kecuali jika dia terus membelakanginya tanpa segera menghadap kiblat. Penentuan sama ada lama membelakangi kiblat atau tidak ditetapkan oleh tanggapan umum

SUKATAN PEPERIKSAAN STM (FIQH IBADAH)

PUASA

Taarif: Menurut bahasa, puasa ialah menahan diri daripada melakukan sesuatu seperti makan, minum dan bercakap. Hal ini berdasarkan firman Allah SWT yang menceritakan perihal Maryam AS.

Dalil:

إِنِّي نَذَرْتُ لِلرَّحْمَنِ صَوْمًا

Maksudnya: *Sesungguhnya aku bernazar diam membisu kerana (Allah) al-Rahman.*

(Surah Maryam: 26)

Hikmah Pensyariatan Puasa:

- i. **Pertama:** Sentiasa mengingati Allah dan kekuasaan-Nya kerana hati orang berpuasa sentiasa sedar terhadap pemerhatian Allah.
- ii. **Kedua:** Cara termudah untuk menunaikan hak Allah dan tanggungjawab hamba kepada-Nya.
- iii. **Ketiga:** Mendidik jiwanya dan mengurangkan sifat-sifat keras hati dan keterlaluan yang bertentangan sebagai seorang Islam.
- iv. **Keempat:** Merupakan waktu terbaik bagi golongan kaya untuk menyelami perasaan orang miskin dan menghayati kasih sayang sebenar terhadap mereka.

SYARAT WAJIB PUASA

1. Islam

Orang yang berpuasa hendaklah seorang Islam. Puasa tidak wajib kepada orang kafir. Dengan kata lain, mereka tidak dituntut puasa semasa hidup di dunia. Ini kerana puasa merupakan satu daripada kewajipan dalam Islam.

Oleh itu, selagi tidak memeluk Islam, amalan dan tuntutan berpuasa tidak bererti bagi mereka. Namun di akhirat, mereka tetap diseksa kerana kufur dan meninggalkan perkara-perkara yang dituntut oleh agama.

2. Mukallaf

Mukallaf bermaksud seseorang Islam yang sampai had baligh dan waras fikirannya (Jilo). Jika salah satu daripada sifat tersebut tidak ada, dia tidak dikira mukallaf. Oleh itu, tidak dituntut sebarang urusan agama terhadapnya. Ini berdasarkan hadith, daripada

Ali RA, bahawa Rasulullah saw bersabda:

رُفِعَ الْقَلَمُ عَنْ ثَلَاثَةٍ عَنْ النَّائِمِ حَتَّى يَسْتَيْقِظَ ، وَعَنِ الصَّبِيِّ حَتَّى يَحْتَلِمَ ، وَعَنِ الْمَجْنُونِ حَتَّى يَعْغِلَ

Maksudnya: “Tidak diambil kira perbuatan tiga golongan yang berikut: orang yang tidur sehingga dia terjaga, kanak-kanak sehingga dia baligh dan orang gila sehingga dia siuman.

3. Tiada sebarang keuzuran yang menghalang puasa atau mengharuskannya berbuka:

a. Keuzuran yang menghalang puasa.

- i. Penyakit yang memudharatkan pesakit atau menyebabkan penderitaan yang teruk. Jika dibimbangi penyakit tersebut membahayakan dirinya, maka harus baginya untuk berbuka puasa.
- ii. Perjalanan yang jauh, iaitu tidak kurang dari 83km, dengan syarat ia adalah perjalanan yang harus dan berterusan sepanjang hari berkenaan. Namun, seseorang yang berpuasa ketika bermukim tidak harus berbuka apabila melakukan perjalanan yang jauh sepanjang hari. Firman Allah swt:

وَمَنْ كَانَ مَرِيضًا أَوْ عَلَى سَفَرٍ فَعِدَّةٌ مِنْ أَيَّامٍ أُخَرَ

Maksudnya: Dan sesiapa yang sakit atau dalam musafir, maka (bolehlah ia berbuka, kemudian wajiblah ia berpuasa) sebanyak hari yang ditinggalkan itu pada hari-hari yang lain.

(Surah al-Baqarah: 185)

- iii. Tidak berupaya melakukan puasa. Puasa tidak wajib ke atas orang yang tidak terdaya melakukannya disebabkan tua atau penyakit yang tiada harapan sembuh. Ini kerana puasa hanya wajib ke atas orang yang mampu melakukannya. Firman Allah SWT:

وَعَلَى الَّذِينَ يُطِيقُونَهُ فِدْيَةٌ طَعَامَ مِسْكِينٍ

Maksudnya: Dan wajib atas orang-orang yang tidak terdaya berpuasa (kerana tua dan sebagainya) membayar fidyah, iaitu memberi makan orang miskin.

(Surah al-Baqarah: 184)

b. Haidh atau nifas pada sebahagian waktu siang

- c. Pitam atau gila sepanjang hari. Jika pulih dari siuman walaupun sekejap, dia wajib imsa' sepanjang hari tersebut.

SYARAT SAH PUASA

1. Islam

Hanya sah dilakukan oleh orang Islam dan tidak sah dilakukan oleh orang Kafir.

2. Berakal atau mumayyiz

Mampu membezakan baik dan buruk. Tidak sah puasa orang gila dan kanak-kanak yang tidak mumayyiz kerana ketiadaan niat. Kanak-kanak yang mumayyiz sah puasa yang dilakukannya. Jika dia mampu, hendaklah disuruh berpuasa apabila berumur 7 tahun dan dirotan jika meninggalkannya apabila berumur 10 tahun, sebagaimana amalan solat.

3. Tiada sebarang keuzuran yang menghalang puasa

Pitam dan gila yang berterusan sepanjang hari serta *haidh* dan nifas.

RUKUN PUASA DAN PERKARA-PERKARA YANG MEMBATALKAN

Mempunyai dua rukun asas: Niat dan menahan diri daripada melakukan perkara yang membatalkannya, bermula dari terbit fajar sehingga terbenamnya matahari.

1. Niat

Niat ialah meng*qasad*kan puasa. Tempat niat adalah di dalam hati dan tidak memadai dengan lisan. Malah, tidak disyaratkan melafazkannya. Ini berdasarkan hadith,

Rasulullah SAW bersabda:

إِنَّمَا الْأَعْمَالُ بِالنِّيَّاتِ

Maksudnya: *Sesungguhnya setiap amalan adalah dengan niat.*

Syarat niat puasa Ramadhan:

- a. Berniat pada waktu malam
- b. Menentukan jenis puasa
- c. Niat berulang-ulang

2. Menahan diri daripada perkara yang membatalkan puasa

- a. Makan dan minum
- b. Sesuatu benda masuk ke dalam rongga melalui ruang sedia terbuka
- c. Muntah dengan sengaja
- d. Bersetubuh dengan sengaja
- e. Mengeluarkan mani
- f. Haidh dan nifas
- g. Gila dan murtad

ADAB BERPUASA

1. Segera berbuka
2. Bersahur
3. Melewatkan sahur
4. Meninggalkan kata-kata keji dan perbuatan yang memberahikan
5. Mandi janabah sebelum terbit fajar
6. Meninggalkan bekam di kepala di badan dan seumpamanya dan merasa makanan atau mengunyahnya.
7. Berdoa ketika berbuka

8. Memberi juadah berbuka kepada orang yang berpuasa
9. Banyakkan memberi sedekah, membaca dan tadarus al-Quran, berik'tikaf di masjid terutamanya pada sepuluh hari akhir bulan ramadhan

PUASA SUNAT

Bertujuan untuk menghampirkan diri kepada Allah SWT dengan mengerjakan ibadat-ibadat yang bukan fardhu. Tidak diragui bahawa puasa adalah antara ibadat yang afdhal. Ini berdasarkan hadith, daripada Abu Said RA katanya: Aku mendengar Nabi saw bersabda:

مَنْ صَامَ يَوْمًا فِي سَبِيلِ اللَّهِ بَعَدَ اللَّهُ تَعَالَى وَجْهَهُ عَنِ النَّارِ سَبْعِينَ خَرِيفًا

Maksudnya: Sesiapa yang berpuasa sehari semata-mata kerana Allah, Allah SWT akan menjauhkan dirinya daripada api neraka selama tujuh puluh tahun.

Riwayat al-Bukhari (2685) dan Muslim (1153)

JENIS PUASA SUNAT

1. Puasa pada Hari Arafah
2. Puasa pada hari Asyura' dan Tasu'aa'
3. Puasa pada isnin dan khamis
4. Puasa selama tiga hari pada setiap bulan
5. Puasa selama enam hari pada bulan syawal
6. Membatalkan puasa sunat

PUASA YANG DIMAKRUHKAN DAN PUASA YANG DIHARAMKAN

1. Puasa Makruh

- a. Puasa pada hari Jumaat sahaja
- b. Puasa pada hari Sabtu sahaja

- c. Puasa sepanjang tahun

2. Puasa yang diharamkan

- a. Puasa pada hari raya aidilfitri dan aidiladha
- b. Puasa pada tiga hari tasyriq
- c. Puasa pada hari syak
- d. Puasa pada setengah bulan yang kedua bulan sya'ban (kecuali bagi orang yang melazimi berpuasa dan meneruskan puasa seperti rutin).

BAB ZAKAT

Pengertian Zakat

Ialah harta pada kadar tertentu yang wajib dikeluarkan ketika terbenam matahari pada hari terakhir Ramadhan, dengan syarat-syarat tertentu ke atas setiap *mukallaf* dan orang yang di bawah tanggungannya.

Dalil Pensyariatan

Dalil Wajib zakat fitrah ialah hadis riwayat Bukhari (1433) dan Muslim (984). Lafaz hadis oleh Muslim daripada Ibnu Umar r.a. Katanya:

Rasulullah s.a.w. telah mewajibkan zakat fitrah pada bulan Ramadhan ke atas setiap orang sama ada orang merdeka atau hamba, lelaki atau perempuan daripada kalangan orang-orang Islam, dengan satu gantang tamar atau satu gantang gandum.

Syarat-Syarat Wajib Zakat Fitrah

- 1. Islam.**
- 2. Terbenam matahari pada akhir Ramadhan.**
- 3. Memiliki harta yang melebihi keperluan makan untuk diri tanggungannya pada hari raya dan malamnya.**

Kadar Zakat Fitrah

- Ialah segantang makanan asasi bagi sesebuah negeri yang *mukallaf* bermukim.
- Gantang yang digunakan oleh Rasulullah s.a.w. menyamai 4 cupak. Ia menyamai 3 altar ataupun lebih kurang 2,400 gram
- Pada zaman kini diharuskan membayar zakat fitrah melalui nilai ini kerana dengan nilai lebih memberi manfaat kepada orang fakir daripada makanan asasi

Waktu Mengeluarkan Zakat Fitrah

- **Wajib**, iaitu mulai terbenam matahari pada hari akhir bulan Ramadhan
- **Harus**, di sepanjang bulan Ramadhan dan hari raya pertama
- **Sunat**, pada subuh hari raya sebelum keluar untuk solat hari raya.
- **Makruh**, selepas solat hari raya aidilfitri hingga akhir hari raya. Sekiranya dia melewatkannya hingga terbenam matahari pada hari raya pertama maka dia berdosa dan wajib mengqada'kannya.

BAB HAJI

Pengertian Haji

Bahasa, haji bermaksud kunjungan, **syara'** ialah mengunjungi Kaabah untuk melakukan ibadah tertentu, dengan syarat-syarat yang khusus.

Dalil Pensyariatan Haji (Al-Quran)

إِنَّ أَوَّلَ بَيْتٍ وُضِعَ لِلنَّاسِ لَلَّذِي بِبَكَّةَ مُبَارَكًا وَهُدًى لِّلْعَالَمِينَ ۚ فِيهِ ءَايَاتٌ بَيِّنَاتٌ مَّقَامُ إِبْرَاهِيمَ ۖ وَمَن دَخَلَهُ كَانَ ءَامِنًا ۚ
وَلِلَّهِ عَلَى النَّاسِ حِجُّ الْبَيْتِ مَنِ اسْتَطَاعَ إِلَيْهِ سَبِيلًا ۚ وَمَن كَفَرَ فَإِنَّ اللَّهَ غَنِيٌّ عَنِ الْعَالَمِينَ 97

Maksudnya: *Sesungguhnya rumah ibadat yang mula-mula dibina untuk manusia (beribadat kepada Tuhannya) ialah Baitullah di Makkah, yang berkat dan (dijadikan) petunjuk hidayah bagi umat manusia. Di situ, ada tanda-tanda keterangan yang nyata (yang menunjukkan kemuliaannya, di antaranya ialah) :Magam Nabi Ibrahim. Dan sesiapa yang masuk ke dalamnya, aman tenteramlah dia. Dan Allah mewajibkan manusia mengerjakan ibadah haji dengan mengunjungi Baitullah, iaitu sesiapa yang*

mampu sampai kepada-Nya. Dan sesiapa yang kufur (ingkarkan kewajipan ibadat haji itu), maka sesungguhnya Allah Maha Kaya (tidak berhajatkan sesuatu pun) dari sekalian makhluk. (surah ali-imran 96-97)

Dalil Pensyariatan Haji (Al-Sunnah)

Daripada Abu Hurairah RA, Rasulullah SAW bersabda:

يُنْبِئُ الْإِسْلَامُ عَلَى خَمْسٍ شَهَادَةٌ أَنْ لَا إِلَهَ إِلَّا اللَّهُ، وَأَنَّ مُحَمَّدًا رَسُولُ اللَّهِ، وَإِقَامُ الصَّلَاةِ، وَإِيتَاءُ الزَّكَاةِ، وَصَوْمُ رَمَضَانَ، وَحَجُّ الْبَيْتِ لِمَنْ اسْتَطَاعَ إِلَيْهِ سَبِيلًا

Maksudnya: “Islam diasaskan atas lima perkara, iaitu: Bersaksi bahawa tiada Tuhan yang disembah melainkan Allah dan Muhammad ialah Rasulullah, mendirikan solat, menunaikan zakat, berpuasa pada bulan Ramadhan dan mengerjakan haji ke Baitullah bagi mereka yang mampu mengunjunginya”

Hikmah Pensyariatan Haji

1. Perhimpunan Orang Islam
2. Persaudaraan Sesama Islam
3. Kesatuan Umat Islam
4. Persamaan di kalangan Umat Islam
5. Mengimbau Peristiwa Lampau
6. Memperoleh Rezeki
7. Pendidikan Jasmani dan Rohani

Syarat Wajib Haji

1. **Islam**
-Tidak wajib ke atas orang bukan islam.
2. **Berakal**
- Tidak wajib ke atas orang yang gila disebabkan tidak mampu membezakan suruhan atau larangan.
3. **Baligh**
-Tidak wajib ke atas orang yang belum baligh kerana tidak dianggap mukallaf,
4. **Merdeka**
-Tidak wajib ke atas hamba kerana tidak memiliki harta.

5. **Aman** **dalam** **Perjalanan**
-Tidak wajib haji ke atas orang yang bimbang akan ancaman musuh terhadap dirinya atau hartanya disebabkan ada kemudharatan.
6. **Berkemampuan**

Syarat Sah Haji

1. **Islam**
-Tidak sah haji orang bukan islam.
2. **Mumayyiz**
-Tidak sah juga haji kanak-kanak yang belum mumayyiz
3. **Berihram Haji pada Waktunya yang Tertentu**
-Waktu yang tertentu atau miqat zamani bagi haji ialah pada syawal, zulkaedah dan 10 hari pertama zulhijjah
4. **Menyempurnakan semua rukunnya**

Rukun Haji

1. Ihram

Rukun ini berdasarkan hadith sahih, Nabi SAW bersabda:

الْحَجُّ عَرَفَةُ، مَنْ جَاءَ لَيْلَةَ جُمُعٍ قَبْلَ طُلُوعِ الْفَجْرِ فَقَدْ أَدْرَكَ الْحَجَّ

Maksudnya: “Haji itu ialah Arafah. Sesiapa yang datang ke Arafah pada malam perhimpunan sebelum fajar terbit, bererti dia dapat ibadah haji tersebut.”

2. Wuquf di Arafah

- Wuquf hendaklah dalam tempoh waktu Zuhur, hari yang ke- 9 Zulhijjah hingga terbit fajar pada Hari Raya Qurban. Ini bererti, seseorang yang wuquf di Arafah sebelum atau selepas tempoh tersebut, hajinya tidak sah.
- Wuquf di tempat yang dikhenedaki di Arafah.

3. Tawaf Ifadhah

- Tawaf ifadhah berdasarkan firman Allah Taala:

Maksudnya: Dan hendaklah mereka tawaf akan Baitullah (Kaabah) yang tua
Sejarahnya

(Surah al-

Haj:29)

4. Saie di antara Bukit Safa dan Marwah
5. Bercukur

Sunat-Sunat dalam Haji.

1. Sunat

Ihram

- i. Mandi sebelum ihram atau bertayammum sekiranya tidak boleh mandi, diikuti semua perkara membersihkan diri, seperti mencabut bulu ketiak, mencukur bulu ari-ari, memotong kuku dan membuang segala kotoran.
- ii. Melafazkan niat, diikuti mengucapkan talbiah dengan suara yang kuat bagi orang lelaki sama ada ketika berdiri, duduk, berjalan atau dalam apa jua keadaan.
- iii. Sebolehnya menjauhi perbualan tentang perkara keduniaan dan bersuka ria.

2. Perkara Sunat Ketika Masuk ke Makkah

- i. Masuk ke Makkah dahulu sebelum wuquf, kemudian dari sana menuju ke Arafah.
- ii. Mandi untuk masuk ke Makkah di tempat yang dikenali dengan Bi'ru Zi Tuwa, iaitu sebuah telaga yang terkenal, di mana tempat Nabi SAW selalu mandi sebelum Baginda masuk ke Makkah.
- iii. Masuk ke Makkah melalui jalan celah-celah bukit.
- iv. Terus melakukan tawaf Qudum sebaik sampai di Makkah bagi menghormati Kaabah yang sentiasa dilakukan oleh Nabi SAW.
- v. Masuk ke dalam Masjid al-Haram melalui pintu Bani Syaibah. Sebaik melihat Kaabah, angkatlah tangan dan berdoa.

3. Sunat Tawaf

i. Melakukan tawaf dengan berjalan sama ada lelaki atau perempuan kecuali yang uzur disebabkan sakit dan seumpamanya. Mereka tidak makruh melakukannya dengan berkenderaan.

ii. Mengusap atau mengucup dan meletakkan dahi di Hajar Aswad ketika melakukan tawaf kerana perbuatan itu merupakan kebiasaan Rasulullah SAW,

iii. Mengulangi mengusap dan mengucup Hajar Aswad pada setiap kali pusingan dengan syarat-syarat yang telah disebutkan tadi. Begitu juga, sunat melakukannya setelah selesai tawaf dan solat sunat.

iv. Berdoa ketika melakukan tawaf.

4. Sunat Saie

i. Jika telah melakukan sa'ie selepas tawaf, sunat tidak mengulanginya selepas tawaf yang lain. Ini bererti, seseorang yang telah mengerjakan saie selepas tawaf Qudum, makruh mengulanginya selepas tawaf Ifadhah.

ii. Sunat naik ke atas bukit Safa pada permulaan sa'ie hingga boleh melihat Kaabah sekiranya tidak ada apa-apa yang melindunginya.

iii. Mengerjakan sa'ie dengan berjalan, selagi mampu melakukan demikian. Sunat berlari-lari anak antara kedua-dua tanda yang ditetapkan dan sunat berdoa ketika itu dan pada setiap kali mendaki Bukit Safa dan Marwah dengan sebarang doa yang dikehendaki untuk diri sendiri, saudara mara dan seluruh orang Mukmin

5. Sunat Ketika Menuju Ke Arafah

i. Pergi ke Arafah selepas memasuki Makkah dan melakukan tawaf Qudum.

ii. Imam atau pemimpin di kalangan orang Islam berucap di Makkah selepas solat Zuhur pada 7 Zulhijjah bagi memberi panduan kepada mereka untuk pergi ke Mina pada hari yang berikutnya dan menerangkan langkah-langkah ibadah haji yang seterusnya supaya mereka benar-benar jelas tentang amalan-amalan yang dihadapi.

iii. Pergi ke Mina pada waktu pagi hari yang kelapan dan tinggal di sana sehingga pagi hari kesembilan. Begitu juga, mengerjakan solat fardhu lima

waktu di Masjid al-Khaif, iaitu masjid yang Rasulullah SAW pernah bersolat di situ.

iv. Menuju ke Arafah selepas matahari terbit pada pagi hari yang kesembilan. Sunat tidak terus masuk ke Arafah apabila menghampiri sempadannya, malah sunat berhenti di Namirah sehingga matahari gelincir dan menunaikan solat Zuhur dan Asar secara jama' taqdim.

6. Sunat Ketika Bermalam di Muzdalifah

i. Tinggal di Muzdalifah sehingga azan Subuh dan menunaikan solat Subuh di sana pada awal waktunya.

ii. Menuju ke Mina selepas mengutip tujuh biji anak batu di Muzdalifah untuk melontar jamrah. Tiap-tiap satu anak batu tersebut lebih besar daripada biji kacang putih dan tidak sampai sebesar biji kacang ful.

iii. Berhenti apabila sampai di al-Masy'ar al-Haram dan berdoa hingga pagi menjelang.

7. Sunat Ketika Melontar

i. Tidak memulakan sebarang ibadah selain melontar jamrah apabila tiba di Mina. Ini kerana melontar jamrah merupakan amalan menghormati Mina pada hari tersebut.

ii. Berhenti mengucap talbiah ketika mula melontar jamrah. Ini kerana Rasulullah SAW sentiasa mengucap talbiah sehingga Baginda mula melontar jamrah dan menggantikannya dengan zikir.

iii. Melontar setiap biji anak batu dengan tangan kanan sambil bertakbir. Bagi lelaki, hendaklah mengangkat tangan sehingga kelihatan bahagian ketiak yang putih, manakala wanita pula tidak perlu mengangkat tangan secara demikian. Anak-anak batu yang dibaling adalah sebesar biji kacang ful.

BAB JUAL BELI

Pengertian

Bahasa, Pertukaran sesuatu dengan sesuatu sama ada dalam bentuk harta atau tidak.

Syara', akad yang diperakukan oleh syara' berpandukan kepada pensyariatannya oleh al-Quran, al-Sunnah dan juga ijma' ulama'.

Dalil Jual Beli

وَأَحَلَّ اللَّهُ الْبَيْعَ وَحَرَّمَ الرِّبَا

Maksudnya: *Padahal Allah telah menghalalkan berjual-beli (berniaga) dan mengharamkan riba.*

(surah al-

Baqarah:275)

Hikmah Pensyariatan

1. Menjauhi Riba
2. Mendapat Keredhoan Allah
3. Menegakkan Keadilan dan Keseimbangan dalam Ekonomi Umat Islam
4. Menjaga Kehalalan Rezeki.

Rukun Jual Beli

1. Pihak yang Melakukan Akad

- a) Waras
- b) Bebas membuat pilihan ketika akad
- c) Penjual dan pembeli adalah pihak yang berlainan
- d) Bolehmelihat

2. Sighah Akad

- a) Lafaz yang nyata (Sarih)
- b) Lafaz kiasan (Kinayah)

3. Barang Jualan dan Harganya

- a) Barangan jualan hendaklah wujud ketika akad dilakukan.

- b) Barangan yang dijual mestilah dalam bentuk harta yang bernilai menurut syara’
- c) Barangan jualan tersebut mestilah barangan yang bermanfaat menurut syara’ dan uruf (kebiasaan)
- d) Barangan tersebut hendaklah boleh diserahkan dari segi fizikal dan syara’
- e) Sah jualan dan belian bagi pemilik harta tersebut kerana syara’ memberikan kepadanya kuasa ke atas hartanya.
- f) Barangan tersebut mestilah diketahui oleh kedua pihak.

BAB RIBA

Pengertian

Bahasa Arab, riba merujuk kepada lebihan, pertambahan dan perkembangan.

Istilah Fuqaha’, riba ialah akad yang dimeterai sebagai pertukaran barang tertentu tetapi pada ketika akad dimeterai pertukaran ini tidak diketahui kesamarataannya menurut ukuran syara’ ataupun penyerahan salah satu atau kedua-kedua barangan tersebut dilewatkan.

Dalil Pengharaman Riba

ذَلِكَ بِأَنَّهُمْ قَالُوا إِنَّمَا الْبَيْعُ مِثْلُ الرِّبَا وَأَحَلَّ اللَّهُ الْبَيْعَ وَحَرَّمَ الرِّبَا

Maksudnya: *Yang demikian ialah disebabkan mereka mengatakan: "Bahawa sesungguhnya berniaga itu sama sahaja seperti riba". Padahal Allah telah menghalalkan berjual-beli (berniaga) dan mengharamkan riba.*

(surah al-

Baqarah:275)

Hukum Riba

Segala urusaniaga yang melibatkan mata wang yang berlandaskan emas dan perak seperti mata wang yang diguna pakai hari ini dikategorikan sebagai barangan

berunsur riba dan segala urusan dengannya boleh membabitkan riba sama seperti emas dan perak.

Demikian juga dengan segala makanan yang biasanya dimakan oleh manusia juga dikategorikan sebagai barangan berunsur riba dan segala urusan dengannya boleh membabitkan riba.

Barangan riba (Item Ribawi)

الذَّهَبُ بِالذَّهَبِ، وَالْفِضَّةُ بِالْفِضَّةِ، وَالْبُرُّ بِالْبُرِّ، وَالشَّعِيرُ بِالشَّعِيرِ، وَالتَّمْرُ بِالتَّمْرِ، وَالْمِلْحُ بِالْمِلْحِ، مِثْلًا بِمِثْلٍ، سَوَاءٌ بِسَوَاءٍ، يَدًا بِيَدٍ، فَإِذَا اخْتَلَفَتْ هَذِهِ الْأَصْنَافُ، فَبِيعُوا كَيْفَ شِئْتُمْ، إِذَا كَانَ يَدًا بِيَدٍ

Maksudnya: “Emas dijual dengan emas, perak dengan perak, gandum dengan gandum, barli dengan barli, tamar dengan tamar, garam dengan garam, timbangan dan beratnya mesti sama, dibayar secara serta-merta (bukan bertangguh). Namun, jika jenis dan kategori barangnya berbeza, maka berjual belilah mengikut yang kamu kehendaki dengan syarat mesti dibayar secara serta-merta (on the spot)”.

Hadis Muslim (1587)

Bahagian-Bahagian Riba

1. Riba al-Fadl (Bayaran Tambahan)

Iaitu riba yang terjadi disebabkan berlaku jual beli yang **tidak sama kuantitinya** sedangkan kedua-duanya daripada jenis barang item yang sama.

Contohnya: Penjual menjual secupak gandum dan pembeli membayar dengan dua cupak gandum, atau 100 gram emas ditukar dengan 110 gram emas atupun kurang.

Unsur riba iaitu bayaran tambahan yang terdapat dalam urusan niaga ini amat jelas dan ketara.

2. Riba al-Nasiah (Bayaran Bertangguh)

Iaitu riba yang berlaku disebabkan terdapat syarat penangguhan dalam penyerahan item ribawi ataupun duit pembayaran secara sengaja kemudian dikenakan caj tambahan.

Contohnya: Contohnya, penjual menjual secupak gandum dan dibayar dengan secupak gandum atau secupak barli atau dua cupak barli dalam tempoh sebulan

barulah pembayaran dibuat. Atau pun penjual menjual 10 gram emas dan dibayar dengan 10 gram emas atau perak atau dengan nilai yang lebih atau kurang dalam tempoh sehari atau lebih barulah pembayaran dibuat.

Urusniaga seperti ini juga haram dan tidak dibenarkan kerana wujud unsur riba walaupun tidak ketara. Pembayaran tunai berbeza dengan bayaran tangguh. Dengan itu, wujud tambahan nilai pada salah satu barangan iaitu barangan yang dibayar secara tunai.

3. Riba al-Yad (Tangan)

Iaitu jual beli barangan berunsur riba dengan barangan berunsur riba yang lain dan kedua-keduanya mempunyai illah yang sama tanpa disyaratkan tempoh tertentu ketika akad tersebut. Walau bagaimanapun, kelewatan menyerahkan salah satu atau kedua-kedua barangan benar-benar berlaku di luar majlis akad.

Dalil hukum ini ialah hadith daripada Umar RA yang dinyatakan sebelum ini yang bermaksud: “Kecuali secara ambil dengan ambil”

Hadith ini menunjukkan penyerahan dan penerimaan wajib dilakukan dalam majlis yang sama.

Kaedah Menentukan Barangan Sama Jenis atau Tidak

Para Fuqaha' telah meletakkan kaedah bagi menentukan barangan yang sejenis dan yang tidak sejenis. Menurut fuqaha', dua barangan yang mempunyai nama khas yang sama berasal daripada kejadian asal yang sama adalah sejenis. Sementara dua barangan yang kejadian asalnya mempunyai nama yang berbeza adalah bahagian yang berbeza.

Maksud nama khas ialah nama yang membezakannya dengan nama am. Contohnya, kata nama tamar adalah nama khas yang membezakannya dengan buah-buahan yang lain. Persamaan mereka hanya pada nama am iaitu buah-buahan.

Maksud kejadian asal ialah keadaan mula ia dijadikan, Oleh itu, persamaan nama selepas dilakukan perubahan atau pemprosesan tidak termasuk dalam erti kata ini.

- Semua jenis emas adalah sejenis, begitu juga dengan perak.
- Semua jenis tamar adalah sejenis, begitu juga dengan kismis.
- Semua jenis gandum adalah sejenis, begitu juga dengan barli.

- Semua barangan terdiri daripada jenis basah dan kering seperti anggur dan kismis, dan kurma (tamar) dan rutob, maka jenis basah dan keringnya dikira sebagai sejenis.
- Barangan yang dihasilkan daripada bahan asal juga dikira sebagai sejenis. Contohnya gandum, tepung dan gandum yang dikisar seperti dedak adalah sejenis.
- Daging-daging pelbagai jenis haiwan dikira sebagai jenis yang berlainan. Kambing (ma'zu) adalah sejenis haiwan dan kambing biri-biri (dho'nu) adalah daripada jenis yang sama. Lembu adalah sejenis haiwan dan kerbau adalah sejenis yang sama. Semua daging unta adalah daripada jenis yang sama.

NIKAH

1. TAKRIF DAN DALIL

Bahasa: Dakap dan bertaut

Syara: ‘Aqad yang mengharuskan hubungan suami isteri yang dibenarkan oleh syara’.

Dalil:

يَا أَيُّهَا الَّذِينَ ءَامَنُوا إِذَا نَكَحْتُمُ الْمُؤْمِنَاتِ ثُمَّ طَلَقْتُمُوهُنَّ مِنْ قَبْلِ أَنْ تَمْسُوهُنَّ فَمَا لَكُمْ عَلَيْهِنَّ مِنْ عِدَّةٍ تَعْتَدُونَهَا

Maksudnya: Hai orang-orang yang beriman, apabila kamu menikahi perempuan-perempuan yang beriman, kemudian kamu ceraikan mereka sebelum kamu mencampurinya, maka sekali-sekali tidak wajib atas mereka iddah bagimu yang kamu minta menyempurnakannya.

(Surah al-Ahzab: 49)

2. HIKMAH PENSYARIATAN

- a. Memenuhi keperluan fitrah manusia
- b. Mengembangkan masyarakat Islam dengan keturunan yang soleh dan generasi terdidik
- c. Mewujudkan ketenangan jiwa dan ketenteraman rohani
- d. Memelihara daripada kemerosotan dan keruntuhan akhlak
- e. Memelihara generasi manusia yang sejahtera
- f. Mengembangkan kekeluargaan dan mengeratkan semangat bekerjasama

3. HUKUM NIKAH

Nikah mempunyai pelbagai hukum berdasarkan keadaan seseorang seperti berikut:

a. Sunat berkahwin

- i. Bagi seseorang yang mempunyai keinginan;
- ii. Memiliki perbelanjaan dan nafaqah (mas kahwin dan sara hidup dirinya serta pasangannya);
- iii. Tidak bimbang dirinya melakukan maksiat jika tidak berkahwin.

b. Sunat tidak berkahwin

Bagi orang yang mempunyai keinginan, tetapi tidak memiliki perbelanjaan nikah dan nafaqah;

c. Makruh

Bagi seseorang yang tidak perlu kepada perkahwinan.

(Contohnya, seseorang yang tidak mempunyai keinginan untuk berkahwin sama ada disebabkan oleh faktor semulajadi, penyakit atau tidak mempunyai perbelanjaan.)

d. Afdhal tidak berkahwin

- i. Orang yang memiliki kemampuan kewangan tetapi tidak berhajat kepada perkahwinan kerana tiada keinginan di samping sibuk beribadat atau menuntut ilmu.
- ii. Lebih afdhal menumpukan kepada ibadat dan menuntut ilmu kerana perkahwinan akan mengganggu tumpuannya.

e. Afdhal berkahwin

Orang yang mampu berkahwin tetapi tidak memerlukannya sedangkan beliau tidak kuat beribadat atau menuntut ilmu. Afdhal baginya berkahwin agar kelapangan masa itu tidak mendorongnya melakukan perkara yang keji.

4. Perempuan yang haram dinikahi

Terdapat dua jenis pengharaman iaitu:

4.1 Haram yang kekal

Haram dikahwini selama-lamanya walau dalam apa jua keadaan. Terdapat tiga sebab haram kekal iaitu:

i. Hubungan kerabat

- a. Ibu, nenek sebelah ibu dan nenek sebelah bapa, dan ke atas. Mereka merupakan asal-usul keturunan yang tidak boleh dikahwini.
- b. Anak perempuan, cucu perempuan daripada anak lelaki serta cucu perempuan daripada anak perempuan. Mereka dinamakan jurai (الفروع) keturunan seseorang yang juga haram dikahwini.
- c. Saudara perempuan seibu sebapa, sebapa atau seibu. Mereka merupakan jurai keturunan ibu bapa.
- d. Anak perempuan daripada saudara lelaki sama ada seibu sebapa, sebapa atau seibu.
- e. Anak perempuan daripada saudara perempuan sama ada seibu sebapa, sebapa atau seibu.
- f. Ibu sedara sebelah bapa (العمة) iaitu saudara perempuan bapa, nenek saudara sebelah bapa (عمة الأب) datuk nenek sebelah bapa. Mereka merupakan jurai keturunan datuk nenek sebelah bapa.
- g. Ibu saudara sebelah ibu (الخالة), iaitu saudara perempuan ibu, nenek saudara sebelah ibu (خالدة الأم) dan sebelah bapa (خالدة الأب). Mereka merupakan jurai keturunan datuk nenek sebelah ibu yang haram dikahwini selama-lamanya.

ii. Hubungan persemendaan (perkahwinan)

Terdapat empat golongan perempuan yang haram dikahwini kerana persemendaan iaitu:

- a. Ibu tiri, nenek tiri sebelah bapa, nenek tiri sebelah ibu. Mereka merupakan isteri kepada asal keturunan yang haram dikahwini selama- lamanya.

Hal ini berdasarkan firman Allah SWT:

وَلَا تَنْكِحُوا مَا نَكَحَ آبَاؤُكُمْ مِنَ النِّسَاءِ إِلَّا مَا قَدْ سَلَفَ إِنَّهُ كَانَ فَاجِشَةً وَمَقْتًا وَسَاءَ سَبِيلًا

Maksudnya: *Dan janganlah kamu kahwini wanita-wanita yang telah dikahwini oleh ayahmu, terkecuali pada masa yang telah lampau. Sesungguhnya perbuatan itu amat keji dan dibenci Allah dan seburuk- buruk jalan (yang ditempuh).*

(Surah al-Nisa': 22)

- b. Menantu perempuan, isteri kepada cucu anak lelaki atau anak perempuan. Mereka merupakan isteri jurai keturunan seseorang.

Hal ini berdasarkan firman Allah SWT:

وَحَلَائِلُ أَبْنَائِكُمُ الَّذِينَ مِنْ أَصْلَابِكُمْ

Maksudnya: *Dan (haram juga kamu berkahwin dengan) bekas isteri anak-anak kamu sendiri yang berasal dari benih kamu.*

(Surah al-Nisa': 23)

Dalil pengharaman ini tidak meliputi bekas isteri anak angkat. Masyarakat pada zaman Jahiliyah mengambil anak angkat dan mengharamkan perkahwinan dengan bekas isterinya. Islam membatalkan taraf anak angkat seperti ini dan menghalalkan

perkahwinan dengan bekas isteri anak angkat tersebut.

c. Ibu mertua

Pengharaman ini meliputi semua keturunan ibu mertua, seperti ibu kepada mertua, nenek ke atas. Ketiga-tiga golongan ini haram dikahwini semata-mata dengan sebab aqad nikah sama ada berlaku persetubuhan ataupun tidak. Sekiranya aqad nikah berlaku dengan mana-mana golongan perempuan tersebut, ia adalah batal.

d. Anak tiri Perempuan

Anak tiri perempuan haram dikahwini oleh bapa tirinya. Pengharaman ini berlaku apabila ibu kepada anak tiri tersebut telah disetubuhi oleh bapa tiri. Ini berdasarkan firman Allah swt:

وَرَبَّائِكُمُ اللَّاتِي فِي حُجُورِكُمْ مِّن نِّسَائِكُمُ اللَّاتِي دَخَلْتُم بِهِنَّ فَإِن لَّمْ تَكُونُوا دَخَلْتُم بِهِنَّ فَلَا جُنَاحَ عَلَيْكُمْ

Maksudnya: Anak-anak isterimu yang dalam pemeliharaanmu dari isteri yang telah kamu campuri, tetapi jika kamu belum bercampur dengan isterimu itu (dan sudah kamu ceraikan), maka tidak berdosa kamu mengahwininya.

(Surah al-Nisa': 23)

Pengharaman ini tidak hanya kepada anak tiri yang tinggal bersama-sama bapa tirinya, tetapi juga termasuk anak tiri yang tidak tinggal bersama-samanya. Maksud anak tiri yang dalam pemeliharaan kamu adalah bagi menerangkan kebiasaan anak tiri tinggal bersama-sama di bawah jagaan bapa tiri dan ibunya. Demikianlah sebaliknya, seorang perempuan haram mengahwini bapa tirinya, menantu lelaki, anak tiri dan bapa mertuanya.

iii. Hubungan penyusuan

Terdapat tujuh golongan perempuan yang haram dikahwini kerana penyusuan. Di dalam al-Quran, disebut dua golongan sahaja, manakala bakinya dijelaskan di dalam hadith Nabi saw. Tujuh golongan tersebut adalah:

a. Ibu susuan

Ibu susuan ialah perempuan yang telah menyusukan anak orang lain. Dia haram dikahwini anak susuan tersebut, termasuk ibu kepada ibu susuan, nenek sebelah ibu, dan nenek sebelah bapanya.

b. Saudara perempuan susuan

Mereka adalah perempuan lain yang menyusu dengan ibu kita atau kita menyusu dengan ibunya, atau kita dan perempuan yang lain sama-sama menyusu dengan seorang perempuan. Jika seorang perempuan menyusu dengan ibu kita, dia haram kita kahwini. Namun, kita halal mengahwini saudara perempuannya kerana mereka tidak menyusu dengan ibu kita.

Jika kita menyusu dengan ibu seorang perempuan, maka kita haram mengahwini perempuan tersebut dan semua saudara perempuannya. Namun, saudara kita halal mengahwininya dan semua saudara perempuannya kerana mereka tidak menyusu dengan ibu kita dan saudara kita pula tidak menyusu dengan ibu perempuan itu. Hal ini berdasarkan firman Allah swt:

وَأُمَّهَاتُكُمُ اللَّاتِي أَرْضَعْنَكُمْ وَأَخَوَاتُكُم مِّنَ الرَّضَاعَةِ

Maksudnya: *Dan ibu-ibumu yang menyusui kamu dan saudara perempuan susuan kamu.*

(Surah al-Nisa': 23)

- c. Anak perempuan daripada saudara lelaki susuan.
- d. Anak perempuan daripada saudara perempuan susuan.
- e. Ibu saudara susuan sebelah bapa, iaitu perempuan yang menjadi saudara susuan kepada bapa.
- f. Ibu saudara susuan sebelah bapa, iaitu perempuan yang menjadi saudara susuan kepada ibu.
- g. Anak perempuan susuan, iaitu anak perempuan yang menyusu dengan isteri kita. Maka, kita ialah bapa susuan kepada anak tersebut. Hal ini berdasarkan hadith, Rasulullah SAW bersabda:

إِنَّ الرِّضَاعَةَ تُحَرِّمُ مَا يَحْرُمُ مِنَ الْوِلَادَةِ

Maksudnya: *Sesungguhnya susuan itu mengharamkan perkahwinan, sebagaimana haram disebabkan kelahiran.*

Riwayat al-Bukhari (2646)

Sepertimana lelaki, seorang perempuan juga haram berkahwin dengan bapa susuan, anak lelaki susuan, saudara lelaki susuan, anak lelaki kepada saudara susuan, bapa saudara susuan sebelah bapa dan bapa saudara susuan sebelah ibu.

Begitu juga haram berkahwin disebabkan susuan dengan perempuan yang berikut:

- a. Ibu mentua susuan, iaitu perempuan yang menyusukan isteri kita.
- b. Anak tiri susuan, iaitu anak perempuan yang telah menyusu dengan isteri kita semasa perkahwinannya dengan suami yang dahulu.
- c. Ibu tiri susuan, iaitu madu kepada ibu susuan.
- d. Menantu susuan, iaitu isteri kepada anak susuan.

4.2 Haram yang sementara

Haram yang sementara bermaksud perempuan yang haram dikahwini untuk sementara waktu atas sebab-sebab tertentu. Apabila sebab yang tersebut hilang, maka perempuan itu boleh dikahwini. Sekiranya perempuan itu dikahwini sebelum sebab pengharamannya hilang, perkahwinan tersebut batal.

Perempuan yang haram dikahwini untuk sementara waktu ialah:

- i. Bermadu antara dua saudara perempuan (الجمع بين الأختين)

Saudara perempuan sama ada nasab atau susuan adalah haram dimadukan, sama ada dengan aqad serentak ataupun berlainan. Sekiranya aqad itu berlaku serentak, pernikahan tersebut adalah batal. Dan sekiranya berlainan masa, maka aqad perkahwinan yang kedua batal.

Jika isteri diceraikan dan selesai iddahnya atau telah meninggal dunia, halal bagi bekas suaminya mengahwini saudara bekas isteri. Firman Allah SWT:

وَأَنْ تَجْمَعُوا بَيْنَ الْأُخْتَيْنِ إِلَّا مَا قَدْ سَلَفَ إِنَّ اللَّهَ كَانَ غَفُورًا رَحِيمًا

Maksudnya: Dan diharamkan kamu menghimpunkan (dalam perkahwinan) dua perempuan yang bersaudara, kecuali yang telah terjadi pada masa lampau. Sesungguhnya Allah Maha Pengampun lagi Maha Penyayang.

(Surah al-Nisa': 23)

- ii. Bermadu dengan ibu saudara sebelah bapa, ibu saudara sebelah ibu, anak saudara saudara perempuan, anak saudara saudara lelaki, cucu daripada anak lelaki dan perempuan.
- iii. Berkahwin lebih daripada empat orang perempuan

Seorang lelaki tidak boleh mengahwini perempuan kelima ketika mempunyai empat orang

isteri. Ia hanya dibenarkan apabila seorang daripada isteri yang sedia ada itu meninggal dunia atau diceraikan dan selesai iddahnya.

- iv. Mengahwini perempuan musyrik yang menyembah berhala

Perempuan musyrik yang dimaksudkan ialah penganut agama yang tidak mempunyai kitab samawi. Perempuan ini halal dikahwini jika dia telah memeluk Islam.

5. Rukun Nikah

Nikah mempunyai lima rukun, iaitu lafaz nikah, isteri, suami, wali dan dua orang saksi.

5.1 Rukun Pertama: Lafaz Aqad Nikah (الصيغة)

Lafaz aqad nikah bermaksud ijab dari wali dan qabul daripada pengantin lelaki. Contoh lafaz ijab ialah: "Aku kahwinkan kamu dengan anak perempuanku" atau "Aku nikahkan kamu dengan anak perempuanku." Sementara contoh lafaz qabul pula ialah: "Aku terima kahwinnya anak perempuanmu" atau "Aku terima nikah anak perempuanmu." Jika lafaz qabul daripada pengantin lelaki mendahului lafaz ijab daripada wali, hukumnya adalah sah kerana lafaz aqad nikah itu sama ada dahulu atau kemudian, tetap mencapai maksud yang sama.

5.1.1 Syarat lafaz aqad nikah:

- i. Hendaklah menggunakan lafaz kahwin atau nikah, atau perkataan terbitan daripada kedua-duanya.
- ii. Lafaz akad nikah atau kahwin dalam ijab qabul hendaklah jelas.

5.2 Rukun kedua: Isteri

Syarat-syarat bakal isteri:

- i. Tiada sebarang halangan untuk bernikah, sebagaimana yang dijelaskan dalam perkara perempuan yang haram dikahwini dan dipinang.
- ii. Bakal isteri ialah seorang yang telah ditentukan jika wali berkata kepada pengantin lelaki: "Aku kahwinkan engkau dengan seorang daripada anak perempuanku," maka aqad nikah tersebut tidak sah. Ini kerana dia tidak menentukan yang mana satu anak perempuannya yang dikahwinkan dengan pengantin itu.
- iii. Bakal isteri bukan dalam ihram haji atau umrah.

5.3 Rukun ketiga: Suami

Syarat bagi bakal suami adalah seperti berikut:

- i. Bakal suami halal mengahwini bakal isteri sekiranya dia bukan mahram kepada bakal isteri tersebut.
- ii. Bakal suami ialah seorang lelaki yang ditentukan. Jika wali berkata: "Aku kahwinkan anak perempuanku dengan seorang daripada kamu berdua,". Maka, perkahwinan itu tidak sah kerana bakal suami tidak ditentukan.
- iii. Bakal suami bukan dalam ihram haji atau umrah berdasarkan hadith yang terdahulu.

5.4 Rukun keempat: wali

Pensyariatan wali atas kanak-kanak dan orang yang tidak mampu mengurus diri sendiri adalah untuk menjaga hak mengatur urusan dan menjaga kemaslahatan mereka agar tidak terbiar

Perkahwinan yang dijalankan tanpa wali oleh seorang perempuan bagi dirinya adalah batal dan pasangan tersebut wajib dipisahkan. Sekiranya telah berlaku persetubuhan, perempuan tersebut wajib diberikan mahar mithil (mas kahwin keluarganya sama ada mahar tersebut disebut atau tidak disebut semasa aqad).

5.4.1 Wali Perkahwinan menurut turutan

- i. Bapa
- ii. Datuk (bapa kepada bapa)
- iii. Saudara lelaki seibu sebapa
- iv. Saudara lelaki sebapa
- v. Anak lelaki saudara lelaki seibu sebapa (anak saudara lelaki kepada saudara lelaki seibu sebapa)
- vi. Anak lelaki saudara lelaki sebapa.
- vii. Bapa saudara sebelah bapa seibu sebapa.
- viii. Bapa saudara sebelah bapa sebapa.
- ix. Anak lelaki bapa saudara sebelah bapa seibu sebapa.
- x. Anak lelaki bapa saudara sebelah bapa sebapa.
- xi. Semua lelaki yang mewarisi harta secara *asabah*.
- xii. Qadi.

5.4.2 Syarat-syarat wali

- i. Islam
- ii. Adil
- iii. Baligh
- iv. Berakal
- v. Tiada penyakit yang mencatatkan fikiran
- vi. Tidak terhalang menguruskan hartanya kerana boros
- vii. Tidak berihram

5.4.3 Bahagian Wali

Terbahagi kepada dua iaitu wali *mujbir* dan wali *ikhtiyar*

i. Wali *mujbir*

- Merupakan bapa dan datuk sebelah bapa sahaja;
- Hanya boleh mengahwinkan anak dara (dewasa atau kanak-kanak, berakal atau gila);
- Bapa dan datuk sebelah bapa boleh mengahwinkan anak atau cucu perempuan tanpa keizinan atau kerelaan;

Syarat sah wali *mujbir*:

- i. Tidak terdapat permusuhan yang nyata antara wali dan perempuan yang diwalikannya;
- ii. Bakal suami yang dipilih mestilah sekufu;
- iii. Bakal suami berkeupayaan menyerahkan mas kahwin dengan segera.

ii. Wali *ikhtiyar*

Semua wali menurut tertib yang dinyatakan di atas. Wali ikhtiyar hanya berlaku bagi mengahwinkan perempuan janda. Justeru, seorang janda tidak boleh dikahwinkan oleh walinya walaupun bapanya sendiri melainkan dengan keizinan dan kerelaannya.

5.5 Rukun kelima: Dua orang saksi

- i. Islam
- ii. Lelaki
- iii. Berakal dan baligh
- iv. Adil sekalipun pada zahirnya
- v. Pendengaran yang baik
- vi. Penglihatan yang baik

TALAK

1. TAKRIF DAN DALIL

Bahasa : Lepas dan terlepas

Istilah : Melepaskan ikatan perkahwinan dengan lafaz dan seumpamanya

Dalil : al-Quran

الطَّلَاقُ مَرَّتَانٍ فَإِمْسَاكَ بِمَعْرُوفٍ أَوْ تَسْرِيحٌ بِإِحْسَانٍ

Maksudnya: *Talaq (yang dapat dirujuki) dua kali. Setelah itu boleh rujuk lagi dengan cara yang ma'ruf atau menceraikan dengan cara yang baik.*

(Surah al-Baqarah: 229)

Dalil : al-Sunnah

أَبْغَضُ الْحَلَالِ إِلَى اللَّهِ تَعَالَى الطَّلَاقُ

Maksudnya: *Perkara halal yang amat dibenci oleh Allah ialah talaq.*

Riwayat Abu Daud (5138), al-Tirmizi (1189) dan Ibn Majah (2088)

5.6 Hikmah Pensyariatan

Perkahwinan adalah untuk mengekalkan kehidupan berumahtangga pasangan suami isteri. Allah telah mensyariatkan pelbagai hukum dan adab perkahwinan untuk menjamin pengekalanannya serta menyuburkan hubungan mereka. Walau bagaimanapun, kadangkala terdapat suami isteri atau seorang daripada mereka tidak mematuhi.

Contohnya, suami tidak mementingkan pemilihan pasangan yang baik. Atau kedua-dua suami isteri, atau seorang daripadanya tidak mematuhi adab pergaulan yang digariskan oleh Islam. Ekoran daripada itu, berlakulah kebencian dan semakin bertambah buruk sehingga tiada lagi ruang untuk berbaik-baik dan tiada lagi cara untuk persefahaman dan hidup bersama.

Dalam keadaan ini, adalah perlu diadakan peraturan sebagai langkah berhati-hati yang boleh dirujuk dalam situasi tersebut.

- i. Ini bertujuan supaya ikatan perkahwinan itu diungkai tanpa mensia-siakan hak kedua-dua suami isteri tersebut apabila tiada sebab bagi mereka untuk hidup bersama. Firman Allah SWT:

وَإِنْ يَتَفَرَّقَا يُغْنِ اللَّهُ كُلًّا مِّنْ سَعَتِهِ، وَكَانَ اللَّهُ وَسِعًا حَكِيمًا

Maksudnya: *Jika keduanya bercerai, maka Allah akan memberi kecukupan kepada masing-masingnya dari limpahan kurnia-Nya. Dan sesungguhnya Allah Maha Luas (kurnia-Nya) lagi Maha Bijaksana.*

(Surah al-Nisa': 130)

- ii. Penyelesaian yang amat perlu yang tidak dapat dielakkan lagi walaupun ia amat pahit dalam banyak keadaan.

5.7 Jenis-jenis Talak

Terdapat tiga jenis talak berdasarkan pelbagai keadaan iaitu:

- i. Lafaz jelas atau tidak;
- ii. Keadaan isteri yang sama ada suci dari haidh (talaq *sunni* dan *bid'i*) dan isteri yang masih kecil atau dewasa; dan
- iii. Talaq yang berganti dengan harta dan tanpa berganti (bukan talaq *sunni* dan *bid'i*).

5.7.1 Lafaz jelas atau tidak

- Lafaz nyata (صريح) ialah lafaz yang menunjukkan maksud talak secara jelas dan tidak membawa kepada maksud lain. Terdapat tiga jenis lafaz nyata yang digunakan iaitu talak (طلاق), lepas (سراح) atau pisah (فراق).

Contoh lafaz talak nyata: *"Engkau diceraikan"* atau *"engkau dilepaskan"* atau *"aku menceraikanmu,"* atau *"aku berpisah daripadamu"* atau *"aku lepaskanmu."*

- Lafaz tidak nyata (كنائية) pula ialah lafaz yang menunjukkan maksud talak secara tidak jelas dan boleh diandaikan dengan maksud yang lain selain talak.

Contoh:

- i. Engkau tiada apa-apa lagi denganku.*
- ii. Engkau berasingan daripadaku.*
- iii. Engkau terputus hubungan denganku.*
- iv. Kembalilah kepada keluargamu.*
- v. Pergilah ke mana engkau mahu.*
- vi. Pergi jauh daripadaku.*
- vii. Asingkanlah diri daripadaku.*
- viii. Aku biarkan kamu dengan caramu.*
- ix. Engkau haram bagiku.*

Hukum:

- i. Penceraian dengan lafaz yang nyata menyebabkan jatuh talaq sama ada dengan niat talaq ataupun tidak. Ini kerana lafaz yang nyata dan maksud yang muktamad menunjukkan talaq tidak perlu kepada niat ketika melafazkannya.
- ii. Lafaz talaq kiasan walaupun selalu digunakan untuk maksud talaq, seperti: "Engkau haram atasmu" tidak menyebabkan jatuh talaq melainkan apabila suami bermaksud menceraikannya. Jika suami bermaksud yang lain selain talaq atau bermaksud apa-apa pun, maka tidak jatuh. Hal ini berdasarkan hadith, daripada Ka'ab bin Malik RA katanya:

فَإِنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ أَمَرَهُ أَنْ يَعْتَزِلَ امْرَأَتَهُ فَقَالَ أَطْلُقُهَا أَمْ مَادَا؟ قَالَ: بَلَى اعْتَزِلْهَا فَلَا تَقْرَبْنَهَا. قَالَ: فَقُلْتُ لِامْرَأَتِي: الْحَقِّي بِأَهْلِكَ.

Maksudnya: "Rasulullah SAW menyuruhmu mengasingkan diri daripada isterimu. Lalu, Ka'ab bertanya: "Adakah aku perlu menceraikannya atau bagaimana?" Rasulullah SAW menjawab: "Hendaklah kamu berasingan daripadanya dan jangan sesekali mendekatinya." Lalu aku memberitahu isteriku: "Kembalilah kamu kepada keluargamu."

Riwayat al-Bukhari (4156) dan Muslim (2769)

Sebab Talaq *Bid'i* diharamkan

Talaq bid'i haram kerana memudharatkan isteri disebabkan panjangnya tempoh iddah kerana waktu haidh tidak termasuk dalam iddah.

Hal ini berdasarkan hadith, Rasulullah SAW bersabda:

لَا ضَرَرَ وَلَا ضِرَارَ

Maksudnya: "Tidak boleh memudharatkan diri sendiri atau memudharatkan orang lain"

5.7.2 Keadaan isteri yang sama ada suci dari haidh dan isteri yang masih kecil atau dewasa (talaq *sunni* dan *bid'i*)

Perempuan yang diceraikan akan berada dalam salah satu daripada tiga keadaan berikut:

- i. **Talaq sunni:** Talaq yang dilafazkan ketika telah suci daripada haidh dan nifas dan tidak disetubuhi oleh suaminya lagi dalam tempoh tersebut.

Hukum: Harus dan jatuh talaqnya. Talaq ini bertepatan dengan ajaran syarak bagi suami yang terpaksa menjatuhkan talaq sama ada talaq satu atau tiga serentak

- ii. **Talaq Bid'i:** Talaq yang dilafazkan dalam keadaan haidh atau nifas, atau dalam keadaan

suci tetapi telah disetubuhi oleh suami dalam waktu suci tersebut.

Hukum: Haram dan berdosa dan jatuh talaqnya kerana bertentangan dengan bentuk talaq yang disyariatkan, sebagaimana firman Allah SWT dalam Surah al-Talaq ayat 1 yang dinyatakan sebelum ini. Dalam hal ini, suami sunat rujuk semula kepada isterinya.

أَنَّهُ طَلَّقَ امْرَأَتَهُ وَهِيَ حَائِضٌ عَلَى عَهْدِ رَسُولِ اللَّهِ صَلَّى اللَّهُ عَلَيْهِ وَسَلَّمَ فَسَأَلَ عُمَرُ بْنُ الْخَطَّابِ رَضِيَ اللَّهُ عَنْهُ رَسُولَ اللَّهِ صَلَّى اللَّهُ عَلَيْهِ وَسَلَّمَ عَنْ ذَلِكَ، فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: مَرْءٌ فَلْيُرَاجِعْهَا، ثُمَّ لِيُمْسِكْهَا حَتَّى تَطْهَرَ ثُمَّ تَحِيضَ، ثُمَّ تَطْهَرَ، ثُمَّ إِنْ شَاءَ أَمْسَكَ بَعْدُ وَإِنْ شَاءَ طَلَّقَ قَبْلَ أَنْ يَمَ، فَبَلَكَ الْعِدَّةُ الَّتِي أَمَرَ اللَّهُ أَنْ تُطْلَقَ لَهَا النِّسَاءُ

Maksudnya: "Abdullah bin Umar R.Anhuma yang menceraikan isterinya ketika haidh pada zaman Rasulullah SAW. Umar bin al- Khattab bertanya hal itu kepada Rasulullah SAW. Lalu, Baginda bersabda: "Suruhlah dia rujuk semula kepada isterinya. Janganlah ceraikannya sehingga dia suci, kemudian haidh dan sudi lagi. Kemudian, jika dia ingin bersama isterinya, teruskanlah. Dan jika dia ingin bercerai, ceraikanlah sebelum menyetubuhinya. Inilah 'iddah yang diperintahkan oleh Allah dalam menceraikan isteri."

iii. Talaq yang tidak disifatkan sebagai talaq *sunni* atau *bid'i*.

Talaq yang tidak termasuk di dalam kategori talaq *sunni* atau *bid'i* adalah seperti berikut:

- a. Perempuan masih kecil yang belum datang haidh.
- b. Putus haidh.
- c. Mengandung yang nyata.
- d. Tidak pernah disetubuhi oleh suami.
- e. Meminta cerai secara khulu'.

Hukum: Harus dan jatuh talaqnya. Ia tidak haram kerana tidak menyebabkan kemudharatan kepada isteri. Isteri yang masih kecil dan perempuan yang putus haidh, mereka beribadah dengan kiraan bulan. Oleh itu, mereka tidak perlu menanggung tempoh 'iddah yang lebih panjang.

Manakala 'iddah bagi isteri yang mengandung pula adalah tamat setelah melahirkan anak.

Begitu juga dengan isteri yang bercerai secara tebus talaq (khulu'), perbuatan menebus diri dengan harta tersebut menunjukkan keinginan isteri untuk bercerai dan kesanggupannya menunggu tempoh 'iddah yang panjang.

5.7.3 Talaq yang berganti dengan harta dan tanpa berganti

- i. Talaq yang tanpa berganti dengan harta adalah talaq biasa dan berlaku di atas kehendak suami.

Hukumnya adalah menepati syarak seperti yang dinyatakan sebelum ini.

- ii. Talaq yang berganti dengan harta atau khulu' ialah talaq yang berlaku dengan kehendak isteri untuk membubarkan perkahwinan. Maka disyariatkan isteri untuk menebus diri daripada suaminya dengan memberi suatu kadar mas kahwin yang dipersetujui bersama.

Hukum khulu' mempunyai beberapa hukum dan diringkaskan seperti berikut:

- a. Harus: hanya berlaku melalui tebusan berbentuk harta yang difardhukan oleh isteri kepada suami. Jika harta tebus talaq itu dimaklumi dan dinyatakan, maka ia wajib diserahkan sebagaimana yang dipersetujui.

Jika tidak ditentukan secara khusus, khulu' tetap sah dan suami wajib diberikan mas kahwin secara *mithil*.

Namun jika suami menggunakan lafaz khulu' tanpa menyebut sebarang tebusan, malah tidak memikirkannya sama sekali, ia adalah talaq biasa secara kiasan dengan lafaz khulu. Oleh itu, ia termasuk dalam jenis kiasan dan jatuh sebagai talaq raj'ie.

- b. Khulu' tidak jatuh daripada isteri yang belum baligh dan tidak berakal kerana tidak berkecualan untuk membuat sebarang iltizam dan sebarang urusan. Tetapi, jika suami yang menceraikannya secara khulu, maka talaq tetap jatuh sebagai talaq raj'ie yang

biasa dan tidak berhak mendapat sedikit pun daripada mas kahwinnya.

- c. Jika suami menceraikan isterinya secara khulu', isteri berkuasa menguruskan dirinya sendiri. Suami tidak lagi mempunyai sebarang kuasa terhadapnya dan tidak boleh rujuk kepadanya dalam tempoh iddah, sebagaimana talaq biasa. Ini kerana khulu' merupakan talaq yang tidak boleh dirujuk (بائن) Sehubungan dengan itu, suami hanya boleh memiliki jandanya semula dengan aqad nikah dan mas kahwin yang baru dan terpulanglah kepada kemahuan jandanya itu.
- d. Zihar, ila' dan talaq yang dijatuhkan oleh bekas suami tidak berkesan kepada isteri yang diceraikan secara khulu' sepanjang tempoh iddahnya. Ini kerana khulu' menjadikan isteri orang asing bagi suami. Keadaan ini berbeza dengan talaq biasa yang boleh dirujuk, iaitu suami masih boleh menceraikan isterinya dengan talaq yang kedua atau menziharkannya dalam tempoh iddah dan mendatangkan kesan terhadap isteri tersebut.
- e. Suami boleh menceraikan isterinya secara khulu' sama ada ketika haid atau ketika suci yang telah disetubuhi, selagi isteri itu orang yang cerdik dan matang. Hal ini kerana penceraian secara khulu' tidak menimbulkan kemudharatan kepada isteri disebabkan ia berlaku atas kehendaknya sendiri, berbanding penceraian biasa dengan kemahuan suami yang akan menimbulkan kemudharatan kepada isterinya.

-TAMAT